

十五國審判

監獄調查記

# 十五國審判監獄調查記

監獄協會會員大理院推事

金紹城  
李方 著

吳興王樹榮校錄

調查日本東京司法記 七月二十五日

日本東京大審院及控訴院地方裁判所合於一處樓上爲大審院下則半屬控訴院半屬地方裁判所門以內爲會議室各課長室次官室大審院刑事二部民事二部控訴院刑事六部民事六部旁聽在樓上大審院開庭每星期刑事四日民事三日觀大審院刑事第一公判庭中爲裁判官席下爲辨護士席又其下爲旁聽席右爲辨護士初到時休憩之席左爲新聞記者席大審院專審法律點故無原被告席也次觀民事第一公判庭與刑事庭組織同此院修造計十有三年矣以時值暑假午後署中無人故所觀甚略也

調查日本巢鴨監獄記 七月二十六日

此監每年所收罪犯平均數約二千五百至三千之譜今年犯者二千八百有奇以西歷六月爲最多此監造成已十五年每監五翼三十格獄中用雜居制惟嚴禁通語言每間

宿舍能容十五人然大致不過住六人或多至九人耳犯重罪者有小影並印指模未成年者另有教育已成年者則否星期三及星期六日有教誨係崇釋教然據藤野君言佛說之收效甚淺往往有在獄中已知悔及出而故智復萌者蓋禍福之說其所以感人者本淺故根株不能盡拔也又言出獄再犯者半由天性之不善半亦由名譽既壞無以謀生所致此免囚保護之制所以亟亟不容緩也有頃典獄官藤澤啟正出見出示無刑錄又名祥刑要覽爲日人蘆德林茂仲氏纂甄錄中國經史關於刑法之事分門纂輯頗稱翔實旋導觀各習藝所分東西南北四部有製革者製衣者作郵政袋者製軍衣者織帽邊者織絨布及犯人衣者搖棉胎者製履者裱畫者雕木器者冶鉄者製佩刀者製銅像者排鉛字者作旋螺釘者紡麻者搓繩者製傘柄者舂米者磨麥者凡工之事數十各執一業因人而施每日作工十小時三日之內有一日可多兩小時休息所作工資犯人可取十之一以作買書及家用飲食平時茹素每一星期一日食魚一日食肉其飯用六分麥四分米和勻煮成也旋至看守教習室記犯人工作之勤惰有電話通至各處如有不守規則者即電告而書之於簿又至教誨堂犯人方聽講間有能以筆記者此監規模甚

宏敞然用雜居制亦與我國奉天天津同而所出之物品似尙不如天津之精美可見天下事非不可爲亦顧其魄力何如耳彼痛詆改良監獄爲多事者是誠何心哉

調查美國華盛頓巡警局記九月初八日

華盛頓巡警局中警務大臣三人其第一人由總統簡派不由選舉餘二人則由第一人保薦總統委任所有一切號令均由總局發出各分局有巡警審判處凡犯警章者拿獲後悉歸各分局審判總局但司警察行政事務裁判之事不過問也本城所有失竊及犯案等事總局於每日印發一單書明案由發交值日巡警每人一分即依單所開列之案詳加查究警察之薪水最初三年每年人給薪水九百圓三年以後升一級每年計美金一千零八十圓五年後再升一級每年加至于二百圓以後升選各就其辦事之勤惰及其才具之能否爲區別無一定之期限蓋再升即爲次巡長次巡長以上卽爲巡長矣以其功過賞罰言之凡警察犯過者應拘入警法廳由長官審判其審判時原被告及見證人等無一不具與尋常裁判同如確係犯過者就其案情之輕重或記過或懲罰大半多科以罰金自五圓至十圓二十圓不等有多至五十圓者此項罰金均由局內記載於冊

亦有因犯過而斥革者如犯過後能拿獲犯案之人以顯其才力勇敢者就其案情大小將從前罰金或全行給還或給還一半設如因過罰金五十圓者以後有功可給還二十五圓或全行給還以示鼓勵凡衛生部探訪局均與巡警總部聯爲一氣華盛頓巡警總部有分局六十餘處歸三警部大臣分別統轄云

調查美國華盛頓審判廳記 九月初十日

尋常審判廳有一裁判官十二陪審員原被告坐次即在陪審官之傍律師與裁判官對座原告上堂時被告律師可以詰問原告裁判官坐聽不贊一詞但律師詰問時儻有不合事理及違犯法規之處裁判官得禁之不得發言被告上堂時原告之律師亦然然兩造之律師若有詰問非理之處則彼造之律師有據法律請求裁判官阻止之權問案時一切情節均由書記官記錄案件經律師及裁判官擬定後必得十二陪審官全體贊成方能有效倘陪審官內有一人不贊成者此案即不能確定因慎重太過流弊反多往往有賄通陪審官若干人遂至案懸長久不結者此法不可效也華盛頓爲美國都會有裁判所多處而檢事長每城止一人故裁判所多委副檢事長代理者出至控訴院裁判官三

人餘坐次與尋常裁判同復觀最高裁判院裁判官九人到者七人其二人因病故出缺尙未補也此院爲最高之裁判惟船廠鐵路及關係全國之案屬於此其制度與尋常之裁判所不同與議院制度大略相似也凡法律學堂畢業之學生不能即日見用須由律師爲介紹得裁判官之許可方得入席旁聽以資練習以備將來亦可作律師以謀生焉

#### 調查美國鮑脫木爾監獄記 九月望日

密爾藍省之鮑脫木爾監獄其監獄長名威勒導觀各處此獄爲該省地方所自建二十年以來未嘗由政府出費其所以能有此款項者因監獄作工係由各處包辦故也工人每日作工若干時均由監督定之若有餘閒願再作工者該工價即係犯人自得之利益犯人勤勉者每月可得十餘圓也每日所作之工均記載於簿次日懸牌公示如有不合犯人得呈請監獄長更正每月結算一次積存之錢出獄時給予本人犯人如有付家用及購置書籍者亦可支取看守人如有待犯人不合法處可自書一紙請見監獄長即於是日下午當面訊問發落故無虐待之弊飲食亦豐美食量多少可以任意惟既添者不得餘賸而不食因獄中人數太多若人人添而不食則暴殄天物矣夏日五句半鐘起

七鐘開工五鐘休息冬日六句半鐘起身七句半開工四句半休息禮拜日息工獄中用分房制每人一間室中桌椅各一鍾及鏡子小影書籍等皆各人自置每室有電氣燈六鐘入室九鐘息火日間雜居工作不許通語夜則分房寢處獄中規則甚嚴因欲使犯人改變性質也餘如廚房廁所浴室皆極清潔所作實業有縫衣冶鐵製革製棕帚等項皆以機器製造蓋係廠家包工故也所收犯人之數本年計一千零四十七人每年各人之費計一百零九圓七角二分獄中收進之工資共六萬二千一百五十九元八角六分常年經費共十一萬八千零三十五元五角送政府每年四萬四千一百二十四元三角五分犯人自得三萬五千零五十九元七角一分犯人在監身體甚健一千餘人止八人在醫院病房之內品行亦頗端正規則雖嚴從不許苛刻相待也惟用包工之法看守之人必須廉潔正直若與包工人串通則流弊不可勝言今歐美諸國大都廢而不用此監由地方自行籌款經費無所出不能不沿用舊法者勢使然也

調查美國費城監獄記 九月十六日

費城監獄獄門外石牆高如城垣鐵門崔巍望之令人神悚及入其中則宏敞如華屋絕

不知其爲狂狷中也其制係用光線形分爲七翼兩翼中間牆上懸一大鏡則對面皆可洞見中央爲看守所一望而七翼之監房盡在目中也監房計七百十間可容一千五百人計終身監禁者三十一人女犯三十四人從前僅習工作今則兼習體操監房分四翼有樓據監獄長云此因限於地勢之故若地勢寬廠以平屋爲宜以其得空氣較多也新添之屋百二十間計五萬二千美金屋頂設一大風扇每房通一四寸徑之鐵管扇之以流通空氣監房平地之下皆網以鐵絲防犯人穴地而遁也其防範之嚴若此然其待之法則極寬厚採用最新發明之不定期刑在獄中能誠心改過者得以隨時釋放飲膳品亦精潔每餐共食牛肉一百五十磅犯人親友皆得入監探視惟止能贈之以錢不得給以物品所贈之錢由典守者代爲收存犯人欲買何物開條付與看守人即代爲購取一切動用之物監中具備而價亦甚廉監房中有置鐘表相片圖畫者有蓄鳥養魚者工作畢後並得買雪茄紙烟而吸之監獄長至犯人房中拍其肩而與之語犯人爲啓門或携物件則必稱謝出入必招呼歡然如家人父子又有音樂亭每禮拜逐日論班作樂是日觀作樂者二十二人皆熙熙而樂若忘其身爲囹圄者真不可及也監獄長從前係巡



捕包探升任此職十餘年矣監中犯人尙有當年爲包探時所捕入者據云待遇犯人當信任之而導其爲善則心悅而誠服若以權術行之一次失信則敗乃事矣又云監獄條規以簡要爲主多則難遵而易犯而法之用易窮犯人入獄之初告以如何遵守之法使之簡而易行即有不善監內之舊犯亦能管束之使不至爲非也至於看守之人亦不宜執鎗蓋犯人多而看守者少若一旦反獄無鎗不過被推倒而止若有鎗爲犯人所奪則反殆矣此皆閱歷有得之言觀養病房凡病人所用器具均入機器爐以藥水煮之病房每日用藥水洗滌二次監中新置造冰機器裝置甫一年水竄至沸度轉注他機旋凝爲冰莊子所謂吾能冬爨鼎而夏造冰者今竟見諸實事矣監中並造有舊時監獄模形牆厚二尺許監房後面有門二重罪人一人其中即加封鎖而前面出一小方洞以遞飲食與中國今制正相彷彿彼反對改良監獄者其意殆欲長此野蠻以終古乎獄中有一中國犯係粵人所犯爲十五年監禁在監已四年習製雪茄已成以所製煙四枝見贈報以美金數元其人本不通英文因入監每日讀書四年以來英文已能粗解矣問其姓不答初入其室夷然甚樂及知余等皆中國人則慘然有懷楚之色於此見人本同此天良偶

蔽於物欲而陷刑網未有不可感化者也監獄長云如得美金十五萬可造一極完備之監獄中國工料俱賤尙不需此數也

調查美國費城貧兒院頑童羈留所巡警局記九月十八日

貧兒院凡收入幼孩有一定格式之空單填明姓名年貌及何項宗教如有人欲乞養者可給予之其最要之點在查明其爲白種爲黑種或爲猶太人種所奉之教爲天主爲耶穌抑爲猶太皆須區別入院之初先查明父母是否貧乏不能養贍如查父母係有力之家可不收領入院以後有人乞養亦有一定格式之單須依單填明單中所填之格式最要者須聲明與某某人相識即派訪查員暗中訪查其人是否有力能贍養此孩其家中如何情形亦須調查明白而後將幼孩給予之檢查員考查時亦有一定格式之單依單填寫大約照例有檢查員五人分赴各處向乞養者所認識之人分別考查畢之後將各人所填之單合而比較以視其符合與否如相合者即屬無誤否則其中必有虛誑之情也幼孩領出以後並不即爲其人之子女必經過一年確係愛憐者方至裁判所存案簽押准其作爲養子然自此以後貧兒院之責任仍未畢也仍須常派人調查小兒如何

情形調查之法亦有一定每一種宗教即由神父至貧兒院報告該幼童已否入學入學之後有一定課程亦須填明交入貧兒院中至成立之後方令自謀生計也又或幼孩無人收領者由貧兒院令入學堂男子以能自謀生女子俟出嫁後而後貧兒院之任始畢矣照例男子以二十一歲爲限過此則當自行謀生貧兒院中不再任贍養之責然由貧兒院出來之人大都十五歲以上者必能自謀生業也如在外謀生忽中途歇業貧兒院之長可代出保薦函俾有機會可圖可謂仁至義盡者矣凡幼孩給人者其家住某處由何處火車而往皆列表載明一覽可知也 復觀頑童羈留所幼童無論男女如有不端行爲爲巡警拘獲者即送入此中監禁其房屋與監獄相類門窗皆以鐵爲之以防其逸但待遇較監獄中稍寬然有行兇之案者必須有保證金方得取保釋出其保證金自三百圓至五百圓不等大約幼童被巡警拘獲者十之五六皆須出保證金方得暫行釋回也此種幼童其案件即歸拘留所委員如中國之縣丞訊問訊問之時間官南面而坐幼童旁立幼童之父母北面而立其大致情形與尋常裁判相似不過無陪審員耳因此地不過訊問緣由並無定讞故也如有謀害等事或年已過十五歲者則移歸警察部辦理凡幼童

拘入之時必令浴身另易一定之服制並令醫生考驗一一詳記於冊羈留期內須入學堂教以書算圖畫雕刻模型等功課余等週覽之時見幼孩三十餘人女孩三人在堂上課教師方授以繪圖及誦書等課也其廁所盥洗室均極清潔臥室亦軒敞每間睡十餘人另有二人臥於房內以便照料一則恐其穴窗而逃一則防有失火等事也 午後往見費城府尹卽乘府尹之車至巡警部考查見巡警部長警部管轄之事甚多分科辦理各有職司如自來水管亦屬警部掌管全城水管皆有詳圖懸掛某處水管毀壞按圖觀之卽可派人至某處掘取修理也凡巡警拿獲犯人訊問之時巡警悉帶面具不令犯人得見老爲巡捕者凡一次聽其聲音之後第二次聞之卽可知其人是否再犯矣故初到巡捕房訊問之時不過問其姓名住址等尋常之事不及案情使巡警辨其聲音是否再犯爲操練巡警計也巡警以布蒙面之法係警部長所創行之二年成效顯著可以避犯人之報復及躲避法國人近亦採用之據老巡警言凡屢犯竊盜之人一觀其目已可得八九孟子言存乎人者莫良於眸子眸子不能掩其惡誠千古觀人之秘訣哉犯人拿獲之後搜檢其身上有無攜帶他物搜畢後送至照相處照相二張一正面一側面是日

有男子裝爲女者令照男女相片各二張存案其存儲相片室共八廚廚內分八十二扇每扇兩面每面計裝相片二十張每廚能藏相片四百八十張計八廚已能容三千六百人矣廚內裝滿卽將舊者退入抽屜廚內每一抽屜能藏照相片百二十張室內照片計藏數十萬張之多也犯罪者分十有三種照片卽依罪案分存若罪人犯兩三種罪者其照片亦分存兩處或三處也男犯女犯白人黑人亦各以類相從照相畢後則量犯人之身體立時身長若干坐時身長若干兩手廣開長若干中指端至肘長若干頭徑前後及左右各若干足之長短若干身之輕重若干耳輪之大小若干一一詳記於冊面有特別記認者另有冊詳記量畢後再印指紋印指之法本取諸中國但西人詳加研究法日以密中國止印大指而西法則五指皆印且其印指之器具皆極精良至易辨識印就之後別有算法依類編號分別存放廚內抽屜分三行爲三大類而每屜中又分三類每一層爲九類每廚九層共計八十一類分析至細檢查極易也故拿獲再犯之人不必問其姓名止須審其面貌量其身體察其指紋三者皆合則其人已無可遁蓋姓名可改易而此則確實可憑任有數十萬人指紋全同者已絕無有況有照相量身之法以輔之秦銅照

贖牛諸然犀奸宄無遁形矣凡典當中典質之物皆須逐日至警部報告以衣服金銀珠飾等項分爲七類依一定格式之單填寫呈送譬如當表一只爲金爲銀某所製皆有號碼爲記依號檢查即可知悉儻有人遺失物件至警部報告但使當在某典幾於不問可知也其當贖物而不報者以窩家論當滿八個月之後不能再行追取故當中所呈送於警部之單八個月卽屬無效然警部則留至十個月以備意外之問題發生也查得失物後失主須照當價取贖惟能拿獲竊盜而押往取贖者可不出價也已復至裁判所觀審案有竊物者有犯姦者有僞造紙幣者最後一人係累犯者問其曾犯案若干次則曰至少亦一千次矣其頑梗若此真可謂怙惡不悛已

調查美國紐約新興監獄記 九月二十三日

紐約監獄監中所收止一年犯滿一年後則每日折罰金一圓用分房制而規模不如費城之宏廠工作均用機器如製棕帶印鉛字製革靴冶鐵之類蓋紐約各項工廠甚多習成出獄即可至工廠謀生也午後至新興監獄制度與紐約相彷彿而監房較寬此省反對不定期刑經自治會議定不採用此制監獄長云不定期刑頗有流弊彼積慣犯罪者

直以監獄爲生活其入監之初確守規則雖良家子不是過積功滿百分則不得不釋既釋而故態復萌遂至再犯且用不定期刑犯人在監不久所積之工資既少出監後無以謀生其不能再犯者勢使然也所論亦不爲無見但不定期刑爲美州新發明之制度歐州人頗多反對者而美人則贊成者居多數此省獨不遵行未知此法果不能實行歟抑此省之人猶拘於舊習而未化歟此非匆匆過境一覽之所能悉他日當再詳加考究耳獄內工作與他處亦相似惟造馬車一項爲他監所罕見犯人出監時每人給洋拾圓衣帽一套車票一紙可謂體恤周至觀犯人午膳魚貫而入各依坐次食畢放碗皆有一定位置故全堂數百人而飯碗每行皆直如一綫即此一端可見監內規則之整齊嚴肅矣午後觀電氣殺人機用一椅令犯人坐其中兩手兩足及手腕額上皆以皮帶扣之有二鐵針一著頂門一著左足腿灣電氣一動瞬息而其人即死此爲死法之最速者但死後則剖腹剖腦以驗之然後縫綻而殮焉一則防其復生一以供醫學之研究乃法律之所許而以中法論之未有不謂爲殘忍者矣

哀爾買勒監獄晨往調查入門見持木槍體操者三十人至樓上見柔軟體操者百人以風琴爲節操畢後均入冷水池洗浴藉習泅水犯人入監後操練三月驗其身體壯健者令習工作不健者再行操練工作如縫衣製靴製襪印字訂書冶鐵製棹椅製皮榻學建造房屋等類所出物品亦不出售歸國家之用如歸公立醫院等用者亦照繳工價也觀養病室病人所衣之衣均另入機器中以藥水殺其蟲然後洗之午飯後觀犯人全隊兵式體操進退左右步伐整齊嗚砲升旗則觀者皆脫帽爲禮與真臨校場無異如此教練無事則多一工作之民有事則多一守禦之兵真良法也晚舒楷忒招飲日本人武田慧宏真木喬谷川義男高安博道同在座酒半主人囑予演說予倉卒未及備因起而言曰予此次之來美洲赴監獄協會也長官命予曰行矣勉之除詳考監獄改良事宜外尙有一極緊要之事則聯絡美人之感情是也予應之曰感情二字夫豈易言聯絡哉長官曰此易易耳但能相與如飲醇然則感情洽矣今某之來此也飲威司克酒不爲不多矣不亦足徵感情之深乎至監獄協會之事宜尤爲繁夥若悉取而呈諸政府將日不暇給或反至無所適從此次回國報告當擇其最切要者而呈之以期事事見諸實行庶幾可以



收效乎諸君其以此說爲然否既而日人請以本國語演說而令其從者爲繙譯主人許之演說畢主人謂王君仁山曰日人可以日本語演說君亦宜以華語演說而請李君譯之王君辭之不得乃言曰自予到美洲以來幾成爲半聾啞人矣凡能了然於心目者竟不能了然於口耳間吾言之而人不知也人言之而我亦不能解也幸聽能語能尙未全失故獲得強自命曰半聾啞然聾者思聽啞者思語人之恒情也主人許予以中語演說予甚愧亦甚感也予至美洲以言語不通甚悶損因至戲園觀劇見有演美人游歷東方者行至日本間日人晨起相見時作何寒暄語或告曰沃哈叶屋沃哈叶屋者猶言閣下甚早也美人云此易易耳其記美州一省之名足矣翌晨相見倉卒誤記他省遽答之曰鈕約克聞者無不失笑夫以美人之聰明游於東方猶不免致誤鄙人今操華語演說其不能不貽笑大方也審矣此則當請主人及衆賓曲諒者也鄙人旣爲監獄協會而來請仍言監獄之事監獄學家尙慈善主義不但欲期監獄之改良且主張死刑之廢止而刑法家之講實驗者往往反對此說鄙意以爲死刑必當廢止但問其程度如何耳鄙人宗孔教請即以我孔子之言徵之子曰善人爲邦百年亦可以勝殘去殺矣夫殘可勝殺

可去非廢止死刑而何哉又曰聽訟吾猶人也必也使無訟乎夫訟且可使之無而何有於死刑之廢止彼刑法家反對之說吾請以矛盾之說破之昔人有鬻矛與盾者自譽其矛曰吾矛之利無堅不可陷也又自譽其盾曰吾盾之堅凡物莫能陷也應之者曰然則以子之矛陷子之盾子將若何其人不能應也今刑法家之言曰刑期于無期實爲刑法不二之宗旨而又曰死刑不能廢止請以刑期無刑之矛盾彼不能廢止死刑之盾其何說之辭雖然勝殘去殺聖人且期之百年今監獄協會方第八次自開始以來止四十年耳尙未及百年之半其不能一蹴而幾刑措之風也固然而無足怪但願我同志諸君持之以定力行之以實心勿徒尙形式主義此事終必有濟耳曾有某監獄長辦事專尙形式不求實際監獄看守長屢諫不聽曰改良監獄乃飾觀之事但求形式上不誤斯可矣其實際之是否不必問也看守長思有以諷之而不獲問一日某上官過境監獄長禮當出迎上官忽改期不來而監獄長不及知看守長乃令窶人子僞衣上官之冠服而過之監獄長出迎見而識之大詫詢知顛末始悉爲看守長所給歸而切責之看守長應之曰君亦觀其形式上不誤斯可矣其實際之是否不必問也監獄長知其諷已也語塞不

能復詰由此觀之我輩日言改良監獄務宜實事求是慎毋徒尙形式以期達勝殘去殺之宗旨則監獄之前途庶有豸乎

按彼時金君拱北因事赴波士頓李君蘭方與榮同赴哀爾買勒調查篇中前半演說詞皆李君之言也 仁山附記

調查美國奧本監獄及女監記 九月二十六日

奧本監獄監房凡四層每層四十二間用分房制而屋甚窄故其床皆有活筭可以起放其浴室皆有短門脫著衣服時則閉之因監獄中每有猥褻之行如此防閑則流弊較少然哀爾買勒監獄中則百餘人皆裸體同浴蓋美國各省監獄制度其管理規則並不盡一然於此可見同浴之風將來必逐漸消滅實社會進化自然之理也監內每日工作八句鐘出品如織呢製衣治鐵製棹椅及鐵床掃帚蒲筵之屬每日讀書一句鐘教以書信算法之淺近者獄中不許通語犯者有罰其罰係禁之黑屋而不扣工資也犯人衣服初犯再犯皆有識別初犯者不令與再犯者共處防其傳染惡習也此省用不定期刑但裁判官之反對此制者或謂裁判官定罪有時反較有定期刑爲重如本爲一年以上五年

以下之監禁裁判官判爲三年以上五年以下之不定期刑若適用定期刑或反止須二年半之監禁而已足則犯人多受半年之累矣爲防此弊故以刑之最長期之半爲起算點譬如本爲一年以上五年以下之有期刑用不定期刑時其起算之點極多不得在二半年以上是也獄中有教誨堂天主耶穌兩教每星期一次猶太教每月一次教主兼管藏書樓凡犯人入獄時亦必由教主驗視之刑期自一年起至終身監禁止犯人不拘年歲故頑童教養院中有犯罪者亦可送入此監也觀養病室甚精潔如有大割證則外請名醫相助爲理醫生每日至工場巡視一週眞病者乃許入養病室以防懶惰者之詐病也全監通計病者約二十人見一中國犯年四十七歲自云再二年可以出監矣殺人亦用電機監中待決者六人每年處電殺者通計約十五人至二十人之譜云午後觀女監一千八百五十九年所造內收女犯一百二十六人其工作係織絨製衣製被褥之類刑期亦自一年起至終身監禁止有讀書堂每日讀書一小時以書算之淺近者女犯有孕即在監中生產今年已有五人其幼孩得留於獄中二年後交親友撫養或送入公家所立之育嬰堂從前產子者不得留諸獄中因一女犯竟因思念其子成病而死故改爲

今制也監中無行刑處曾有一女犯應處死刑者送至男監中處決也一省之中有女監三處以初犯再犯三犯爲別但初犯者不送至他處以免週折其再犯三犯者積至三四十人則用專車送往所觀者乃再犯監其中亦有初犯者但另爲一區蓋初犯之刑期短在再犯三犯監獄地方即留本地監中以免轉送之煩再犯三犯者刑期長且不便與初犯監獄混雜故積至三四十人必須轉解也

調查美國抱絲墩之康酷特遷善局記 九月二十二日

晨九鐘參觀康酷特遷善局該局自創立後已三十年局內所監禁各囚徒其年歲約自十五歲起至四十歲止過幼或過老者不能監禁於此大約以二十歲左右者爲最多又初犯者亦不在此監禁統計局內共有犯徒七百八十人其數最多時間或逾千其中以少年無賴爲最多數犯徒每日必須工作七小時之久傍晚自六句半鐘至八句鐘必須上課堂學習識字讀書等課計一小時有半八點一刻必入獄房安睡不許作聲囚徒所作之事如雕刻木器紡織泥水木匠耕種之類各視其性之所近而教之往往有年少無賴一物不知禁錮數年後翻然改過自新恃其在局時所習技藝以謀衣食而自立者據

監獄委員云該局房屋皆係局內犯人所建造惟其所用器械機器則皆自外購來者本局所產及所造之物至爲良美遠駕乎他省監獄內之產品云本局一切經費皆屬本省官款故其所產物品出賣後其進款統歸入公家本局所有土地面積計廣二十二英畝局內廚房飯廳皆極清潔精緻適合衛生之道蓋美國各處監獄於清潔衛生秩序三者最爲注重也又局內設有製冰器終日有冰水及熱水流通各房間復有冰室以儲藏菜蔬魚肉以防腐臭其所用製冰器爲最新式因冰水熱水由一機器同時而出也犯人工作而外又須學兵式體操逢星期日則俱至局內所設禮拜堂誦經悔過犯人無論平素信教與否莫不願赴禮拜堂做禮拜因平日除工作外必須關閉小監房惟禮拜日得全集大廳靜聽演講稍免拘禁之苦也局內設有醫院病房犯人如有病則由官醫驗明屬實至病房醫治免其工作復設有藏書室犯人准其於一定時間至室內觀書無論何時或工作或觀書均不得交頭接耳互相言語惟午餐暨晚餐前准其盥洗講談十五分鐘之久該局中等罪犯以監禁五年爲度但亦有不過二年半即釋放者統視其在局時確否改善及工作程度如何但釋放後該犯須指定往何處工作謀生仍受該處巡警包探

監視及密訪如仍犯過則須拘留回本局加罪監禁以示懲警又犯人所穿之衣袖上均縫有黑帶其帶之多寡即表其罪之等級云

調查英國威姆斯屋奪監獄記 十月十四日

威姆斯屋奪監獄乃一千八百七十幾年時所造監房分四翼每翼樓高四層每層每翼容八十八人現收犯人一千四百餘人末層之頂以鐵絲網罩之防居最上層者圖墮樓自盡也此監所收者皆短期罪犯監禁至二年爲止其二年以上者送至達姑沃及頗倫地方此獄以河爲界河以北之犯人入此監河以南者另有監獄入監之初每人皆印指紋存案備查並令醫生驗其體格宜歸入何項工作管理員百四十四人監中每日工作八句鐘工作品如藤篋棕帚木器洋機縫衣製毯打繩訂書洗衣熨衣之類或教以駕駛之術出獄後即至船上爲水手焉工作時用雜居制不得通語欲言者必先告知管理人得許可後方得通語每日運動一點鐘至教堂誦經半點鐘宗教分爲天主耶穌猶太三種以耶教爲最多不識字者讀書一點鐘工作之物歸公家用而仍給價故犯人亦可稍得工資但監禁雖至二年所得工資不得過十仙令以上監房每人一間飲食亦在房中

別無飯堂每日人食麪包一鎊半山薯二十四兩監房之外皆書本人名氏及何宗教宗教以顏色爲區別並記工作分數而反誦之不令其名爲衆所見也有澡房每半月浴一次入監之初臥於平地其作工勤而品行好者於衣上別爲記號三月後升入第二班則給與鐵床飲食亦特別有時得食肉其尤佳者得減去刑期六分之一幼年犯自十六歲至二十歲者分別居住工場亦另在一處十六歲以下者別有幼童教養院不入此監監內規模亦頗完備但不及美國費城監之宏敞飲饌之豐美管理之週密亦所不如其尤不善者即所給工資不得過十仙令以上也夫人之所以犯罪者以迫於貧困者爲多在獄久者得錢稍多猶可望其出獄後得以自立今以十仙令爲限則生計窮而再犯者衆矣凡人之意中苟以犯人爲可惡之人則給予工資已爲特別優待故必加以苛刻之限制此實由復仇主義之病根未拔至出此倒果爲因之謬見不意英國猶仍此制而不革也

調查英國累奪罕兒教養學堂記十月十五日

累奪罕兒教養學堂中總理乃王叔坎那脫公爵副理六人其三人爲上議院議員會



計官一人議員二十二入院長一人副院長一人醫生內外科各一人牙醫二人管藥庫一人凡五村分爲五院各有院長一人此學堂在一千七百八十八年創立一會專爲幼年犯罪事者而設立於罕格納村中教以耕種及作家之事使能成家立業一千七百九十二年由罕格納移至稍施瓦克省之勝教及施斐爾村造此院時男女均收至一千八百四十九年移至累奪罕爾之地始專教幼童不收幼女但此時制度係將幼孩交與他人撫養成人而使之自謀生業自一千七百八十八年起至一千九百零六年止所收養者凡七千人自建立學校以來收留者五千四百十五人已教成而釋出者五千一百七十七人其中有一千九百零一人乃移至各屬地者此院廣二百六十五畝(每一畝克合中國六畝)內有四畝克之地係租賃者現有三百人作工分隸五院每院六十入院外另有教堂演戲臺辦公所作工廠等處每院有夫婦二人爲之長屬於總院長之下 凡幼孩之初入院也但照相而不印指紋不欲以罪犯之法待之也所收幼孩有在學堂之時有作工之時初入院者皆習農業再觀其行爲性質令擇習一種工業如木工冶鐵製履縫衣餅師泥匠牧童僕役之類其所造就大約家庭之課較諸學校之課尤爲注重院中罰規甚少

而獎勵較多其宗旨不外乎使之自新知信仰宗教待人仁慈持己公正用善良文字爲之勸導使皆有恆業而兼有恆心焉宗教止有英國耶穌教一門而已院中基地均係會中產業房屋亦會中所有故會中專派一人掌之凡幼童應收與否皆有管理之權在院期滿或品行端正而先期釋出者總以安置遠處爲主或薦在本國或薦至屬地在四年之內院中尙有監察之責時時致函以相勸導也院中隨時可以參觀但須先期通知院長醫院中無一病人幼童身體之強健可知體操均用瑞典陸軍操法在此院釋出者卽作爲能自新之人如有功於陸軍中卽可授以軍職也所收自十二歲起至十六歲止皆再犯者其初犯而次數多者亦入之刑期皆在三年以上期滿出院時另給新衣一襲臥房窗上有繩遇火災拉其繩窗卽開可由窗而出然繩之一端繫以鈴通知他室有人掌之拉其繩卽有聲平時不能無故偷開也院中設有救火會亦按陸軍法操演云 收入幼童條規 凡收入之幼童由裁判官依一千九百零八年議定幼童法律或爲皇帝所特赦之幼童或由別處送入照例須十二歲以上十六歲以下身體壯健可任耕作之人最要者須年紀相當能在院中作工五年年最大者以十九歲爲止如品行端正管理人

有縮短其刑期之權釋出時給予憑據一紙內部參贊若因其人品行可佳給予憑據亦得釋放大約有可釋放之處必設法使之出院但一面又必令受足完全之教育且不背裁判官判定之期限也初犯者除有特別規定外一概不收其有收入者必須詢問院長也

調查英國潘痕得痕維爾監獄記十月十六日

此監乃一千八百四十六年所造最初時男女老幼雜居一處今改用分房制度監房凡四翼每翼四層或三百二十間或二百八十五間其餘室則管理員居住也屋係半輪式中爲看守處全監可一望而知光線形之外此式亦甚便利刑期自三日起至二年止蓋輕罪監也監獄長一人俸每年七百八十五鎊住公家房屋監中現收一千零九十一人工作如編蒲篋製洋鐵器劈柴

英人燒煤爐所用之引火柴  
長半尺許每桶小僅盈把

縫衣製褥訂書印字之屬又有作布袋者皆散處一室因此等人大率有腦病不能禁閉禁則生病亦不能作細工也體操每日一點鐘飲食男每日麪包二十四兩女每日十五兩至二十兩每日作工有一定時刻以做滿其時爲度每人每日平均須得八工初入監

者在房中工作計三十日後已滿二百四十工者始歸入工場工作也維管理之人每日須立視至十時之久甚爲困難導觀者居此職已十五年自言初時亦頗覺累人久之習慣亦不覺也然終宜設法用兩人輪值爲妥耳管理員年至六十五歲可以退休其夜間巡守之人牆角設一鐘每二鐘巡行一次輒自轉之若脫班不轉者即可查知監中工作之物亦歸公用而仍給價犯人所得工資雖監禁二年者不得過十仙令其弊與威姆斯屋奪監獄同犯人入監時稱其重量以後每月稱一次如瘦過十鎊以外者則請醫生診視之監中有鐵練甚長凡解犯人至別監者用之每人桎其一手如有在監房中擊毀器物者則反戟其手而梏之夜則拏而使睡但以二十四點鐘爲限又有一鞭下垂九繩名曰九尾貓用以鞭背極多不得過二十四下每年不過用一二次用時各官皆須到堂從前每繩皆有結今雖無結然一鞭輒見血云鞭扑之刑久爲環球所痛詆而英獨存此制而不革雖曰每年止用一二次何如盡去不用之爲愈乎觀探監處用鐵絲窓隔絕犯人在窓內探監者在窗外兩面有人在旁監察之初入監者每二月得入探一次第二次須越六星期以後每越二十四日一次初次止得相語二十分鐘以後則可至三十分鐘

欲探監者須領取監獄中之憑據方得入也次觀病院病者三十二人又有一皮屋係禁瘋人及醉漢者室中不置一物無論如何發狂不慮損傷也從前四壁用席因不適於衛生特改今制然造此屋一間已需英金一百鎊矣獄中有耶穌教猶太教二種耶教每日聽講猶太教每星期止二日犯人多有改歸耶教者非真信仰耶穌也乃嬾於作工而偷此片刻之間耳聽講時幼童居前中空兩三行年長者居後觀被殺人埋葬之地近七年以來始在此監殺人葬此地者十有五人矣又觀絞罪機器高數丈頂穿一孔懸繩其上下有空室如方井上架一板令犯人立於上反載其手縛其兩足以布袋蒙其面以繩扣其頭身上繫一沙囊其重量與犯人之身體相等抽去其所立之板犯人身驟離空下墜丈許瞬息即死自入室至死時不過三分鐘死後懸至一旬鐘之久然後命醫官驗之越二鐘裁判官驗視畢即葬諸獄中有謀殺人未遂犯本係監禁十二年因不服而上控判加監禁三年又有醫生謀殺其妻監禁待決者錄其案情如下英國醫士克立賓娶妻某氏已有年矣後與外婦通妻覺之亦不禁也醫者潛與外婦謀以毒藥殺其妻并用強水化其骨肉以滅迹妻本在某學堂爲教習久不至醫者僞以病告旣而復詭言赴美國至

母家就醫數日則言妻死於美俟其燒葬後靈柩歸英將爲之設奠焉同人或疑之發信至美探問則其妻初未歸愈疑之因提起訴訟偵探往詢之則又詭云吾妻實不死蓋隨人逃耳吾以顏面所關故託言其死以掩飾焉偵探迫之甚醫與外婦遂偕逃不知所之偵探搜其室無所得入窟室見一磚似曾掘過者乃發之得餘髮二縷破衣一角化驗之中有毒藥徧詢各藥肆則醫者果於某日向某藥肆購此種藥料也醫者與外婦之偕逃也醫士劑其鬚而外婦則改爲男裝僞託爲父子欲乘快船恐爲偵探所躡故乘一極慢之船其意固欲落偵探之後則無從踪迹也庸詎知天網恢恢疎而不漏醫與外婦居此船艙內方作目挑心與之態船主從船頂窗中望見之而二人不覺也船主觀之稔知二人者決非父子形迹可疑且預知英國有此案遂於中途發無線電至倫敦偵探乘快船踵至已預料其必有剃髮易服之舉故一登岸而即擒之醫到堂猶反覆狡展然卒不能舉出不殺其妻之反證遂以此定案其外婦始終不承有同謀之情故醫者處決而外婦遂釋出然既與同逃又改男裝疑竇滋大若以中法論對於此婦未免近於疎縱矣

調查英國審判廳記十月二十三日

觀英國高等審判廳及大審院地方審判廳英國地方審判廳凡三種曰鎗司拉考脫關於契約等事屬之曰清司伴痕起關於貿易及交涉之事屬之曰提覆司汝脫關於離婚等事屬之鎗司拉考脫凡十二庭平時止用九庭皆有陪審官凡納房金至八十鎊以上者得爲尋常陪審官每陪審一次可得一仙令納房金百二十鎊以上者得爲特別陪審官每陪審一次可得二十一仙令然陪審官不用專門法律之人而以納房金之多寡爲比例雖曰英人程度人人皆有普通法律知識究非制之善者也清司伴痕起並無陪審員然鎗司拉考脫之案件以十八個月爲限必須清結而清司伴痕起則有十餘年不結案者訟費亦甚大頗滋流弊也出觀贓物陳列所有手槍炸彈偽紙幣偽銀幣短刀鎖鑰之類又有賭博器具及行竊所用之梯處死罪犯人之模型謀殺妻之醫士破案後所掘得之髮及破衣亦在焉醫士已處決亦有塑像在此

調查法國聖拉沙女獄及孫德輕罪監記十一月初四日

聖拉沙女獄係收未定案之女犯及有病之幼妓或犯警章之妓女者從前係教堂基地創建於一千七百八十三年改爲女獄已八十年矣現收七百餘人極多至八百人已定

罪者不監於此間有一年以下之輕罪得留於此監者監內工場四所已定罪者之工場二處必須作工未定罪者工場亦二但作工與否可以聽便作工以縫紉之事爲多亦有洗衣者每日早八句鐘起晚八句鐘止除飯時二鐘外每日作工八句鐘幼年不識字者有女教師每日課讀書二鐘星期一星期四二日無課飲食每日二次星期一及星期四日得食肉未定案女犯之有錢者得自行購買食物又有特別監房待質女犯如欲住者每日須繳費二十五生丁有病之幼妓每人居一間防其有傳染也妓女犯警章由巡捕送入者或監禁一天多至三天另有一室可容九十人乃雜居制也病院樓凡三層醫生六人習醫而爲之襄理者六人有化驗室染花柳病者可化驗其毒之輕重以爲治也大約全監分爲五部未定案女犯爲一部已定案輕罪女犯爲一部女犯有幼孩在四歲以下亦得留住監中者爲一部幼妓之有病者爲一部妓女因犯警章而暫行拘禁者爲一部除監房外又有律師接見犯人處有探監處甚小凡分三格間以鐵絲窗犯人與探監者隔窗而語看守人在第三格監視之禮拜堂二一天主一耶穌法人以從天主教者爲多每星期誦經二句鐘獄中總理一人收支一人文案一人庶務一人管理員十四人女



管理員三十六人皆教會中人也獄中經費皆由政府支出每年二十八萬佛郎作工之物得以出售可收回六萬佛郎云此監制度亦尙完備但不甚清潔其浴室因有病人時用硫黃薰之而洗滌未淨氣息甚穢以視美國奧本女獄不逮遠矣午後往觀孫德輕罪監蓋待質所也內監分四區計一千四百間建造已六十年新建之四區僅十二年現收犯人一千四百五十人并已定案之輕罪犯計算未決監人各一室已定罪者用雜居制因在監之日無多也作工無工場皆在監房之內亦無一定時刻以未定罪之犯人不得以犯罪論故得自由也飲食亦各在房中每日兩餐星期日及星期四日得食肉其犯三月輕罪者監禁已滿即可留在監內服役此外有病室探監室及監禁瘋人室四壁幔以布中以軟質物襯之與英國皮室之制相似而精美不逮且室亦太黑凡有腦病之人不宜禁於黑闇之小屋須用爽塏之處爲宜耳教堂一係天主教他教另有一小屋無教師但自行祈禱而已

調查法國童子感化院記 十一月初五日

此院創立已九十年犯人分爲二種一爲三月輕罪犯未定案在此待質者一爲頑童有

因犯罪拘入者有由父母送入者凡父母俱存者母不得送其子須由其父出名父沒則母亦得送入若有後母則父不得遽送前妻之子非有親族爲證不可所以防流弊也待質之輕罪犯監禁無定期定案之後則送至別監頑童由父母送入者至多亦止監禁六個月幼犯年齡自十歲起至二十歲止未成年之犯罪法律上本無責任若父母願罰金贖罪者不可不入此監現收之犯計三百八十人大半犯竊者居多有兩幼童謀殺二童之案亦監禁於此監中用絕對分房制似覺失之太過不但日間作工每人鎖禁一室即每日早晚至課堂讀書亦每人一格各以木板障之休息處亦每人一間止一面盆得以浴首獨居空地仰首視天亦毫無生趣監禁半年直不能與人通一語其道太毅反乎人情名爲感化實與禁閉六個月無異釋放後必至退化且又無體操以活動其身體殊不得辦法之宜此法亟應改良中國如辦感化院切不可循此舊法也工作品以玩物爲多如以洋鐵製馬車汽車或以紙糊洋燈罩之類監中總理一人教士一人文案一人副文案二人收支一人庶務一人看守三十四人而以一人爲之長監中服役之人即用年長罪犯之監禁期滿者爲之每月給工資十五佛郎至二十佛郎管理員五人其四人每年

自一千七百佛郎起逐年遞加一百佛郎至二千佛郎止管理長則每年三千二百佛郎也幼孩作工所得之錢十之六歸政府十之四歸本人但由收支處代爲收存釋放時交其家中若有正用亦必得管理員之許可方得支用也常年經費八萬七千佛郎犯人所得工資歸入國家者一萬八千七百七十二佛郎犯人每人每日約費八十生丁云

調查法國貧民感化院記十一月初六日

貧民感化院建自一千八百八十三年逐漸擴充現在規模日益完備其中分二大類一爲乞丐由巡警捕入者監禁極多至三年以罪人之法待之二爲貧民自向巡警呈請入院作工者並無一定監禁期限去來可以任意以工人之法代之院中分爲五區第一區爲乞丐第二區爲無業遊民第三區爲有病而尙能工作之人第四區爲老人第五區爲殘疾之人男居院之左女居院之右中央爲客廳係新建者亦有上等之貧民中間亦有新建之室可居也共收四千五百人男約三千女約一千五百女子能作工者不過三百人餘均老病殘廢者女子有幼孩亦可帶入院中有人爲之管理男工場十二所女工場一所工作之物如製袋訂書製銅鐵鍊製帽罩之屬此外尙多未及徧觀醫院醫士十一

人總醫士三副醫士七另有牙醫一人外科一人有割症室診病室其他犯人接待室及花園菜園等皆極精潔飲食日三餐老人每日食肉幼年者惟星期日及星期二得食肉麵包多少無限制院中不設禮拜堂歸教者每星期日由院中給憑出至他處教堂祈禱罪犯皆限定本日回院貧民可以任意若一月以後不歸則開除其名不得再入院矣者病死者由院中殮殮另有塋地葬之如中國之義塚然此院規模甚爲完善可法處極多尤有二大特色在歐洲爲罕見一則優待老人也七十非肉不飽在中國已成耳熟之語歐洲法律保護幼童者多而於老人不甚措意癯鬻虐老見於漢書凡游牧時代必重少輕老者勢使然也今法於老人特別優待此其進化之彰明較著者也一則院中不設禮拜堂也歐西各國科學雖發明而迷信宗教之風猶極盛法則科學最昌明故宗教之力亦最薄弱雖不能一概掃除然如此院之無禮拜堂在他國必以爲莫大之缺點矣此亦足見歐西各國其風氣迥乎不侔也院中常年經費爲一兆三十六萬四千五百佛郎工作費收入爲十三萬七千六百五十八佛郎犯人每日費八十四生丁云

調查法國弗雷洛監獄記十一月初七日

此監甚新建造纔十二年歸內部管轄監房一千八百間現收犯人一千四百之譜又有雜居制房數處可容四百人樓凡五層房內桌椅電燈廁所喚人鈴均備桌係一板釘於牆可以收放小椅以鐵鍊鎖之防犯人持以擲人也喚人鈴須按一定章程如有病或工作有不解處可請人診視及指教濫按鈴者有罰所收之犯刑期皆在一年零一日以下一年以上罪者歸入中央監獄也工作分二十餘科如紙糊燈馬料袋銅鍊鐵鎖縫衣洗衣之屬皆工藝之簡易者以監獄刑期甚短故也工作時刻自早五鐘起至晚六鐘止工作時不許通語所得工資半歸公家半歸犯人然惟初犯者如此再犯者止能得十之四三犯者止能得十之三耳此外有探監處每星期可見二次有澡堂每半月浴一次有散步室每人一小院樓有迴廊則監察人巡視處也教堂與讀書同在一處能容二百五十人監中共分三區每區五百人須分作六班學堂每人一星期兩點鐘必須到堂星期日講經到否聽便猶太教人另派一人爲之講經然法國猶太教人甚少也屏禁室亦通光線與他處用黑屋者不同有一瘋人禁於室中方跳舞而歌詢之云未經醫士驗視眞僞未可知故暫禁此室如驗係眞瘋則移送瘋人院中也飲食各在房中別無飯堂法國

監獄大都如是由於用絕對分房制之故此與美國不同之處每日三餐人食大麵包一個有定限與他處微異每星期食肉二次有錢者亦可自買兼可買酒此亦見法人平時喜飲酒之一端但飲酒須有限制耳

調查法國巡捕監記十一月初八日

法國巡捕監之屋自大革命以前已有之其改爲巡捕監則自一千八百六十四年始也凡犯警章者由巡警開明其所犯緣由送至總巡捕房由總巡捕開明其姓名年貌住址職業及所犯何罪送入監房巡警所開之單則送入總廳存案犯人監禁在此自二十四鐘起至四十八鐘止不得逾此限凡被巡警拿獲之人必須於四十八點鐘以內裁判也監禁之後即通知檢察長提起公訴而候裁判判定無罪者即釋放有罪則分送各監男犯人孫德輕罪監女犯人女監幼童入感化院此係巡捕房暫行監禁處所故無審判權亦無案卷但於入監時至量犯所量其身材登記簿中而已犯人攜帶之物品另有一室存儲詳記於簿令本人簽押釋放時令出一簽押收據而還之凡要犯監禁者用分房制犯警章之輕罪則可雜居每日犯人之進出無常大約通計三百五十人男二百人其一

百五十人則皆妓女也監中總理一人總巡查一人總收支一人副收支二人總書記官一人副書記官二人收掌物件者總管一人副者數人男看守四十五人其女看守二人則教會中人也次至提犯守監所凡犯案而未定罪者暫禁於此定案後則送至別監其已定罪而欲上控者亦禁於此監房計一百五十間休息處每人一間照章每人每日一小時然地甚小人多時亦有不及休息者飲食每日二次有犯人接見律師室因犯人欲至裁判所必先與律師接洽也

調查法國審判廳記十一月十三日

法國審判制度初級審判爲單獨制其裁判官由政府任用每星期審案一二次自一佛郎起至一千五百佛郎止若所定之案在一百佛郎以下者不得上控過一百佛郎至一千五百佛郎止皆得上控也第二級爲控訴院巴黎分七處全國共二十六處用合議制裁判官三人管轄初級裁判所及工商業裁判所控訴之案件所定之案若在一千五百佛郎以下者不得上控在一千五百佛郎以上者得上控至大審院也但此係指動產而言若係不動產其租金在六十佛郎以上者定案後不得上控過六十佛郎以上者亦得

上控也大審院爲司法最高機關其所審理之案即不服控訴院之判決而上告者也刑事裁判初級自一佛郎起至十六佛郎止刑期自一日起至五日止爲單獨制第二級自十六佛郎起以上無限制刑期自一日起至一年止爲合議制裁判官三人第三級自一佛郎起以上無限制刑期自一日起至死罪止合議制裁判官五人惟第三級有陪審官十二人餘無陪審與英美制度略異民事裁判分九庭以事分類九庭之外另有一處專主調停凡有訟事先爲和解不能調處乃爲審定此案應屬某庭令至某處起訴也全國分八十七省省之下有府每省有一府尹管理巡警之事小案件及外人交涉之案皆有管轄之權自華盛頓開會後法亦新設幼年裁判庭即於普通民事庭行之每星期一次法庭不公開所以保全幼童之體面也

調查法國大審院記 十一月十三日

觀法國大審院蘭芳仁山與述勤偕往昨日於院內開律師二百年紀念會蓋法之用律師其來已久矣院中有法王聖路易像及聖路易親自爲裁判圖蓋聖路易乃十三世紀時羅馬法王所派管理法國之王也（卒於一二七零年）給地一區即爲今大審院之始



基自十五世紀迄今此地永爲大審院之用法王查爾士第七愈助之地一千六百十八年及一千七百七十六年兩次被焚止餘四角飛閣餘均化爲灰燼矣其東北角名曰道來齊一閣在十三世紀時已有之中有漸門披隆之像上有一鐘甚華麗乃一千三百七十年所造一千六百八十五年及一千八百五十年重修此爲法國第一最古之大鐘也從石階上升爲迴廊右轉有七民事庭合之爲民事初級裁判廳其大廳事自一千八百七十四年被焚後重建樓上有廊腰甚長計二百四十尺寬九十二尺高三十三尺在法國亦爲最大之迴廊左旁有石像曰墨爾雪勃司乃一千七百九十四年在審謀反法堂上助路易十六世爲革命黨人所殺者也像係寶馬所雕對面爲復勃來之紀念牌乃有名之律師死於一千八百六十八年者也左旁爲初級民事控訴院初爲聖路易所造路易十二世增修之今已改造非復舊制矣飛金之堂名曰大堂其入門之路爲路易十六世所造甚爲宏壯一千七百九十三年革命時之審判廳卽設於此路易十六世皇后亦於此處定罪也觀刑事庭每星期開庭三日今日適無案件中爲裁判官座凡七人右爲檢察官左爲顧問官各七人對面爲律師座也因時已晚不及徧觀出遇述勤法國舊時

同學在報館爲主筆司法律一門約明晨至述勤處將探詢中國改良監獄刑法情形以爲登報之材料也。

調查比國審判廳及警察署記 十一月十九日

調查比國審判制度先觀刑事預審廳中三座爲裁判官左爲書記官右爲檢察官中央對裁判官座者爲證人陳述處左爲原被告右爲陪審官皆橫座再下則左爲證人右爲律師皆與裁判官座相對次至大審院小法庭中爲裁判官凡九座左爲總書記官右爲總檢察官以下左爲律師右爲旁聽大審院專問法律點不問事實點故原被告不必出庭也此庭尋常民刑事事件合用四壁繪法官像可見百餘年來法官衣服制度之沿革復至大審院大法庭此庭裁判官十有七座其餘檢察書記律師旁聽座與小法庭同此爲特別大法庭不輕開惟法官任用時至此宣誓或有謀反及大官犯案法官枉法等事則開此庭裁判官有七人到堂者即可定案也次至高等審判廳會議處中九座合左右各座凡五十有七蓋全法院各裁判官人各設一座也此惟開庭時用一次衣紅色禮服律師新到院者亦坐此庭次至工商業裁判所裁判官九座居中檢察官書記官律師原被

告旁聽座俱備凡三庭裁判官皆以商人爲之由商家公舉若干人請君主欽定任期三年任內不得兼營別業商人於法律未詳悉者另有書記官爲之指示所管轄之案自一佛郎起至三百佛郎止十五日以內必須定案以期迅速判定不服者得至民事高等裁判所上控也次至民事高等審判廳裁判官三人居中檢察官書記官律師原被告坐次與餘庭同軍法裁判所因門未開不及觀比國裁判之制最初一級止一裁判官不算入審級之內所謂息訟委員者是也初級裁判九庭民事五庭刑事四庭裁判官各三人高等裁判八庭裁判官各五人大審院二庭刑民各一裁判官各七人尋常止用一庭其特別大法庭非有大案及變更法律事件不輕開也此法院建築之圖係奇渥派依拉脫所繪而其規畫則出自威稜司也自一千八百六十六年起至一千八百八十三年止凡有十三年而始落成計費一百七十六萬鎊(合比金四千四百萬圓)內有二十七庭計二百四十五間其東北西北二庭爲最大一即大審院特別大法庭一即高等法庭會議處也旁有兩翼皆用兩重石柱門首有二大石階自外觀之止二層側面觀之凡三層而內容實係四層也由平地起金十字架頂高三百四十尺四壁畫像皆關係法律之故事門

首有羅馬法王及羅馬名律師石像其建築大概兼採埃及羅馬之制雖不尙華麗而落  
落大方在十九世紀時可稱爲歐洲有名之建築物占地二十七萬方尺比羅馬聖彼德  
教堂猶大蓋羅馬教堂止占地二十六萬三千方尺也午後至法部觀警察檔案及人名  
彙存處先觀無政府黨人名存案處凡無政府黨人國家警察偵得之卽存其年貌籍貫  
於冊有萬國警察會與會之國其國人旅寓比國者無論犯罪與否皆須書明姓名年貌  
住址職業送警察署備案其無護照者限半個月補繳屆期不繳者驅逐出境存案處男  
女分類依字母爲次序檢查甚易本國人惟犯罪者存姓名於警察署平人不川此制也  
復觀收存案卷處書架上下皆有輪可以推動甚爲便利今藏書樓亦多用此法矣案卷  
三十年一次清釐其人已沒者則燒燬之又觀指印收藏處其法與英美大同小異而稍  
簡便警察言英人犯罪者好易假名比國此弊甚少所存指印十七萬張其假名者止六  
十餘人可蓋犯罪者有照片有指紋故再犯而易假名亦易於稽覈也

調查比國珊聚兒監獄記 十一月二十日

此獄爲一千八百七十八年所造至一千八百八十四年落成壁間多書古格言監房凡

六百間圓形樓二層內有三翼爲廚房病房及麵包房監房內電燈鐵床皆備現收六百人之譜用絕對分房制犯人不得通語見人則以布蒙其面工作亦在房中自六鐘半起至晚九鐘止休息處六分房圓形每翼後皆有之計二十四間蒔花一弓地頗精潔所收之犯其刑期自一日起至五年止未定罪待質之犯亦收入焉待質監雖用雜居制而每人一床仍用薄鐵壁隔斷并有一小鐵門可以關閉較諸數人混處一室者猶有間也宗教分天主耶穌希臘三種而以天主教爲最多探監每月二次每次十五分鐘讀書每日一點鐘星期六日無課年四十以外者不讀無體操以用絕對分房制故也飲食每日三次其麵包必須由監獄長親自驗看每星期食肉三次病院甚精潔鐵床極高棹椅盥具俱備病人祈禱另有教堂休息處院亦甚大每年經費計六十萬佛郎作工係包辦每一佛郎抽三十生丁歸監獄其餘七分公家得三十五生丁犯人亦可得三十五生丁也此外有律師與犯人相見處每日皆可來有量身處犯人入監時須至此量其身體手足長短大小皆記於簿屏禁室僅透微光極多不得過八日禁瘋人室四壁皆軟屋頂用藍色玻璃因有心病者見藍光則心可稍定也對面新造監獄尙未落成俟竣工後將築隧道

使與此監相通而左近一舊監獄則將廢而不用也。比利時以叢爾小國而於監獄之改良不遺餘力，各大國皆取法焉。中國言及改良監獄，動以經費支絀爲口實，或以人民程度不足爲詞者，其亦可恥之甚也。

調查比國盧萬監獄記 十一月二十一日

此監爲一千八百六十年所造，樓三層，監房六翼，計六十間，休息處凡十所，每所容十二人，用絕對分房制，犯人不許通語，工作亦在房中，冬則每日八九鐘，夏日或多至十二鐘，收犯人五百六十人，刑期皆在五年以上者，工作品如木器、冶鐵、縫衣、印書、洋鐵器、布袋、麻繩之屬，皆歸他處監獄公用，工資以十之三歸公，其餘七分依犯罪之輕重分等級，輕罪者得七之四，其次得七之三，五重罪者得七之三也。禮拜堂圓形，分五翼，坐次每行九人，每人一格，層累而上，高十層，最下層在平地，左右各五行，每行分三格，宗教止。天主一種，奉他教每送入別監，犯人讀書、英、法、德、文皆可，自擇其讀，英文者出監後多至美國。云藏書室藏書六千部，爲他處監獄所不及。病院分兩翼，一翼爲病房，計十二間，光線空氣皆極好。一翼爲醫藥室及廚房，醫士二人不住院，每日來監診視病者，大約百分中之一。

飲食每日三次每翼皆有人專管大概七分鐘即可送齊休息處亦每人一間在晨起五句半鐘時休息時可以吸烟有洗衣處凡犯人初入監者衣服皆用藥水漬洗有澡室每月浴一次屏禁室窓有小圓孔透微光如中國脚爐蓋之狀居屏禁室不得過九日禁瘋人室頂用藍玻璃與珊瑚兒監獄同因用絕對分房制故亦無體操也

調查比國剛脫監獄及古刑具陳列所并小監記十一月二十三日

剛脫監獄乃一千四百七十年所造圓形分爲八翼樓三層每層監房二百間現收七百七十人女犯及幼童亦附收焉此監收禁輕罪犯故不純用分房制晝則雜居夜仍分房此制實自比國首倡今美人全國均仿此制卽號爲美國之新制實則竊取比國之制而稍加變通者也惟作工時仍不許通語工場中有六人看守之重罪犯人之刑期在盧萬監獄已滿十年願入此監者亦可移入宗教止天主教一門教堂與飯堂合在一處星期日即在飯堂中祈禱蓋用絕對分房制則在監堂吃飯而無飯堂用畫間雜居制則飯堂不可少也病院以中間一翼爲之病人得食牛肉嘗其羹味亦甚美醫士三人監中病人亦頗少也無體操每日於飯前散步一點鐘亦別無休息處所讀書每日一小時年老者

刑期在六個月以下者終身監禁者皆不讀書也飲食每日三次每星期得三次食肉較他處監獄爲優探監分三等輕罪每星期一次最重者二月一次通信亦然工作每日八鐘夏日九鐘如皮工木工縫衣冶鐵釘書製布袋之屬皆歸公用公家無物可做亦可用包工法而出售之國內有免因保護會故在監作工勤者卽預爲留意出獄後卽爲代荐作工地方也其職員正副總辦各一人教士三人教習四人書記五人會計一人工寫書記三人庶務一人畫司看守者六十八人夜司看守者十二人另有學習者六人每一星期晝夜輪班常年經費一百萬佛郎尋常看守人每月一百五十佛郎看守人每月三百佛郎監獄長每年一萬佛郎內一犯終身監禁者曾犯殺人罪判終身監禁久之得釋復犯殺人禁諸獄中逃而復獲現已在獄二十餘年其所犯之罪皆由妬姦而起少時不知戒之在色垂老而禁錮監中亦良可悲矣幼童十一歲以上十五歲以下者另禁一處凡七十五人讀書堂設有音樂器具爲幼童心理之所喜也往觀時適午餐甫畢飯具皆各自揩洗出觀古刑具陳設處有新監獄小模型見舊時殺人機及犯人烙印之鐵斷手之斧又有一木中穿小孔兩旁繫皮帶犯人有喧囂者則以木塞口而縛皮帶於頸其他鐵鍊



鐵球鐵鞭鐵枷皮衣皮帶之屬種種酷虐刑具皆羅陳之比自獨立以來即廢止死刑不用而犯罪之統計轉較英法各國爲少亦可見防止犯罪之法斷非武健嚴酷所能勝任而當從風俗教化上著想爲治之要固在此而不在彼也彼以寬刑爲姑息養奸者亦未深知爲政之本耳午後觀本地小監獄爲一千八百六十二年所造計監房三百八十二間分六翼病院亦分房遇一種疫症則須雜居樓上然監中未嘗遇見此種疫病也監獄中床棹椅凡火爐窓簾食器架畢具婦女監房尤清潔常年經費每年約五千佛郎旁有雜居制低洋鐵屋高不過丈許每一床各有一小門十餘間相嬾連名爲雜居實與分房無甚差異此爲過境寄監犯人及罪不滿七日以上者居之中國當改良監獄伊始邊僻小縣或爲經費所限不得已亦可姑採此法較諸數人雜處一室者猶覺彼善於此也其餘洗衣室辦事室休息處皆精潔不染一塵此監雖小而造法甚巧中央看守所爲六角玻璃房一望而全監皆在目中看守所之上層即爲教堂其下層當看守所之四隅即爲聽講所在樓上宣講而環聽者皆在目前教堂後之四隅爲讀書堂雖容人不多而佈置極得法無一隙廢地也婦女犯罪者以墮胎爲多離婚之案則甚少且亦甚難離婚之婦

女社會上亦頗不名譽比國事事摹仿法國有小巴黎之目法國崇天主教夫婦止可別居而不得離婚婦女自由多不喜育子而有墮胎之惡習此其風俗傳染之所由來者漸矣此監不輕許人入觀其題名簿前年止一人去年止二人今年亦止一人予等三人題名在今年纔第二次也

調查和蘭海蘭監獄記 十一月二十六日

海蘭監獄乃千九百零二年所建凡四年始落成樓四層圓形如傘故荷俗手洋傘監獄他處圓形監獄皆分數翼每翼之兩旁爲房屋中通一弄此則中間一大圓圈屋皆在四週制度又自不同對徑五十密達高三十二密達監房二百零四間縱四密達橫三密達二十生丁現收犯人一百七十有八用絕對分房制不許通語見人則以布蒙面刑期自五年以上起至終身監禁止蓋荷蘭亦廢止死刑也工作分四大類曰布曰木曰羊毛曰鐵每日工作十二小時犯人之勤者每年可積至一百哥倫作工各在房中有人在外梭巡其不作工者罰入屏禁室宗教有天主耶穌二種亦用離隔制堂中可容一百四十二人探監每月一次每次十五分鐘飲食日三餐每星期食肉一次無體操有休息處二十

所讀書由教習二人逐房分教亦頗不便蓋分房制之長處在於防止惡習之傳染而讀書體操等事不能合衆人於一處而教之則其短處也病院有養病房而醫生不住院中每日來一次犯人印指模及量身等法亦借病院爲之管理員薪水每年六百哥倫監獄總長每年二千四百哥倫監獄長名房斯搭拉姆其餘職員有坐辦一人管理二十一人醫生一人教習二人他如浴室蒸衣室辦事室屏禁室亦均完備此監形式極新然如此建築不甚透空氣和蘭濱海之國可用此制若中國南方炎熱之地此制似非所宜又此監處處漸新而病房似不及他處之精美豈以地在鄉間故歟

調查和蘭海牙待質所及監獄記 十一月二十七日

海牙待質所係一千九百零二年所造凡一百五十六間現收待質者一百零三人工作與否聽本人自便願作工者亦可稍得工資待質最久者亦不得過七個月管理員共八人婦女待質所二十七間輕罪用雜居制然每床仍用白鐵離隔之休息處亦每人一間屏禁室有後窓可啓閉開則微透光閉其半則闇全閉則黑如中夜矣蓋以敞閉寓賞罰之權也教堂可容百二十人探監處會議室辦事室皆備待質之人本非犯罪僅爲犯罪

之嫌疑入耳待之宜與常人無異否則監禁日久審判時知其確係無罪從前枉受之苦已不可好贖矣西人現頗有提議無罪被禁者政府應任損害賠償之責亦以經費過鉅未能辦到中國現雖不暇議及乎此然欲改良監獄於待質所不可不三致意也午後往觀司該文審監獄係一千八百八十六年所造樓三層監房二百十間每間高二密達六寸生丁長四密達寬二密達七十生丁現收犯人一百九十有三用絕對分房制不許通語宗教分天主耶穌二種探監每星期二次然其地甚小無體操每日休息半句鐘飲食日三次每星期食肉止一小塊有病不消化者爲記號於門少給之食此亦用絕對分房制運動太少之故也工作如木工銅鐵器縫衣織布印書等項勤者可多得工資然每日至多不得過二角半蓋防其工作時刻太多有碍衛生也所得工資以一半歸犯人買物之用一半存儲候出獄時給與之有浴室三每月浴一次辦事人會議室每半月議一次共十座犯人不守規則者罰入屏禁室管理員二十七人監獄官吏皆由欽派此乃五十年以下之輕罪監也

按和蘭之監獄由一千八百八十六年之刑法而出不外二種罪名一爲法律上之犯罪

者二爲違犯章程者其刑罰分爲三種一曰懲役二曰禁錮三曰感化院懲役專爲重罪犯而設禁錮爲輕罪犯而設即無意中犯罪及犯輕微之罪者是也法律上處罰金而力不能繳者送入感化院處禁錮者亦可入之感化院中醉漢及流氓皆禁於此感化院之監禁自三月起至三年止用雜居制禁錮亦用雜居制懲役犯工作未滿五年者用分房制滿五年以上者雜居分房可以任意

總理監獄之織司 此制由一千八百八十六年之刑律而出全國監獄悉歸政府管理以法部大臣爲之長以下有總辦副總辦各一人總辦管理監獄之大綱及一切法律辦法爲政府之代表副總辦專管監獄辦法及度支出入之數以下復有稽查員二人又由地方公舉名譽稽查員三人至十五人由法部大臣稟請欽派隨時考查監獄中各項事宜雖不取薪水然爲監獄所用之費仍由政府給還地方官按照法律亦應時時考查監獄人數若干有無無故被禁在獄者每一監由法部大臣派出一人管理工作本地方亦派出七人管理工作事宜地方所派出者係名譽員

監獄管理員分爲六類(一)監獄長一人副長一人司管鑰者一人(二)會計員一人典

簿一人(三)看守所長及巡丁(四)管理工作員(五)厨丁機匠及掃除房屋雜役(六)教師(分爲二級)

調查和蘭國審判廳記十一月二十八日

和蘭初級審判庭裁判官三座居中左爲書記官右爲檢察長兩旁橫列者右爲原被告左爲證人中間與裁判官座相對者爲政府所派之辯護士以下爲旁聽座新聞記者旁聽座則在證人之後也刑事民事上訴院裁判官皆五座餘制同上次觀待質所凡四間用雜居制蓋到裁判所暫居以候審判之地也又有律師會議處裁判官會議室書記辦公室皆附設於審判廳者也和蘭審判制度大審院總理一人副理二人裁判官十五人檢察官一人副檢察官三人書記官一人副書記官三人總理薪水每年七千哥倫控訴院五處地方審判廳二十五處初級審判廳一百零五處控訴院一在阿墨斯土坦一在海牙其制相同總理一人每年薪水五千五百副理二人薪水各五千裁判官十二人薪水各四千五百檢察官一人薪水五千五百副檢察官一人薪水四千五百書記官一人薪水三千五百副書記官三人薪水各二千幫審官四人名譽職其餘三處制度稍殊總

理一人每年薪水五千副理二人薪水各四千五百裁判官八人薪水各四千檢察官一人薪水五千副檢察官二人薪水各四千書記官三人薪水各三千副書記官二人薪水各二千幫審官三名譽職地方裁判所總理一人每年薪水四千副理六人薪水各三千五百裁判官二十五人每庭三人薪水各三千檢察官一人薪水四千副檢察官八人薪水各三千書記官一人薪水三千副書記官十人薪水各一千五百幫審官十八人名譽職各省小有異同初級審判廳裁判官六人每年薪水各三千書記官一人薪水三千副書記官五人薪水各一千五百檢察官每庭一人薪水一千五百幫審官二十四人名譽職此荷蘭審判制度之大略也

調查荷蘭古獄記十一月二十九日

荷蘭古獄陳設各種刑具受杖者男女各有木架縛於架而後加杖有橫臥者有豎立者有兩人同縛於一柱者又有烙印鐵模燒紅而烙於臂有敲骨刑具作斜十字形如人之兩手兩足中有頭形如蝶翅然上放鐵棍一鐵斧一縛犯人於鐵架敲碎週身之骨最後乃擊其心其殘虐至此乃二百年前之刑法也十六世紀時或鎖罪人於樓而餓殺之其

樓之對面即庖廚使聞食味之香而不得食也一室中壁上有畫云係一千五百二十五年禁教士於此畫爲教士刺血所繪其後此教士卒被焚殺又一室懸一武士像當時一武官囚禁其弟殺之被擒遂并殺之而倒懸其尸以示衆今尙留其影片也其餘殺人之刀甚多又有一木刀係當時遇赦者以木刀斬其頭以當行刑亦甚可笑和蘭比利時皆廢止死刑故殺人之刀均歸入古刑具陳列室中現在世界改良監獄荷比二國獨占優勝之勢且二國皆廢止死刑不用而犯罪者轉較他國爲少若嚴刑可以止姦則二國從前之酷刑大可仍之不廢何苦廢國家無限之金錢以優待罪人爲哉豈中國人獨智而西人皆愚歟彼痛詆改良監獄以爲不亟之務者可以三思矣

調查丹麥可本海克新舊監獄記十二月初三日

此獄爲十六世紀所造十七世紀增修蓋舊監獄也房二百間皆日間雜居夜間分房另有五十八間居女犯三十間居男犯則絕對分房制也刑期自六月起至終身監禁止亦有死刑用斧然不輕用婦女殺罪已數十年不行矣先觀女監其刑期自六月起至三年半止者用絕對分房制三年半以上至終身監禁者作苦工故日間雜居工作夜則分房



也工作約三四種如製銅練糊紙袋織襪縫衣洗衣之類係由私家包工然僅能派一人來獄中看視不能干涉管理之權也工資每人每日極少二窩痕即二文多亦不得過八窩痕餘歸監獄輕罪監禁數日者則無工資也探監第一等者每月一次第二等者兩月一次三等者三月一次等第以作工之久暫及勤惰爲區別監獄長對於犯人有升降其等第之權而不能伸縮其刑期飲食日三次午餐或魚或肉必有一葷早晚則或食面包或食熱皮酒也教堂有二一爲耶穌教堂容人甚多下半爲離隔座上半爲雜居座坐次層累而上羅馬教禮拜堂則止三座次蓋奉天主教者極少也女監中學堂每星期讀書三次每次兩句鐘男監無之蓋丹麥有強迫教育男子無不識字者故也沐浴每星期一次病院中有患癆病者二人室內開窗以通空氣并另設癆病醫院以犯人患此病者甚多且防其傳染也婦女育孩者另有一室較他室稍寬滿一歲則送入公家育英堂養育之丹麥之例凡父女不能養育厥子國家得奪而代之撫養內一女犯殺其親生之子處以終身監禁夫虎狼不食其子人至殺其所生則殘忍已極中律則卑幼弑尊長加等治罪理猶可通尊長殺卑幼而減等殊非用法之平也女監中總理一人副理一人稽查

一人教士一人醫生一人管理員十五人尋常犯人每日放工二次每次散步半句鐘另有柔軟體操室則專備有病者之運動也男女分房監係一千七百十九年所造用絕對分房制犯人二十名管理者三人作工皆在房中見製木及結網者二人蓋皆簡易之手藝也夜臥用繩床作工時則收之休息處亦分房屏禁室分二種一則床有臥褥一則止一磚坑蓋入第一室猶不悛者則遷至第二室也探監處不用鐵絲窗隔絕可與犯人同居一室而談較諸他國爲寬但有人在旁監督耳全監經費每年約十萬元工資所入可得一萬二千元政府歲出須八萬八千元也

午後往觀新監獄見監獄長蘇息夫此處半係輕罪犯習藝所半係貧民教養所占地二十二畝建築費二百五十萬監房甚好病院尤精潔工作皆織絨紡紗縫衣之屬洗衣用機器自入水至晾乾凡經過玻璃室四重止須三十分鐘業已洗淨烘乾疊就矣院中收貧民五百八十人犯人二百五十人教堂係耶教但聽講與否可聽自便犯人用分房制貧民則男女雜居工作別有妓女監禁室收禁犯警章之妓女用雜居制而臥房仍用白鐵隔絕也

## 調查丹麥可本海克地方監獄記十二月初四日

可本海克地方監獄乃一千八百九十五年所造樓三層共三百零六間最下一層有鐵絲網以防居高樓者下墜自盡與英國之法同監房內有鐵床木棹椅並有電燈熱氣管刑期自一日起至六月止有待質人犯因案未結則監禁稍久又或稍有腦經病者亦略展其禁限全係病狂者則送入瘋人院也現收犯人分房者三百九十人雜居者六十人蓋採折衷制也工作分木工鐵工織布製衣織襪之屬玩具甚多亦係鋪戶所包做者所作木馬下懸木錘撥其錘則馬之頭足俱動製頗靈巧其他虎豹犬馬之類亦皆雕刻畢肖也宗教止耶穌一種教堂聽講座亦用離隔制計一百四十座無體操每日休息二次每次三十分鐘休息室圓形凡二十六間中央六角玻璃亭爲看守人所居蓋一望而四面俱見也探監處亦不用鐵絲窗隔絕待質者每星期二次尋常罪犯每月一次飲食有湯有麪包有肉每人皆送至房中惟星期六日食魚餘每日皆有肉日三餐每人約需丹金半圓較他國爲優與美國費城相似蓋丹麥待犯人亦極寬也其在待質所者有錢則各物皆可自購另有廁所三十六間與他處或出廁所於監房或設便溺具於房中者不

同但夜間則仍用便溺器也見鋸板機器鋸作圓形旋轉如風鋸木片極速又有一機器室專爲通空氣暖氣之用洗衣機器與昨所見者同浴室每月浴一次病院十間亦極清潔犯人不守規則者入屏禁室有欲圖自盡者別有監禁之屋室中床棹及椅皆不能移動餘無他物雖欲尋短見不可得也另一室有一犯臥於牆角云係醉酒過度腦經受傷近於瘋病也從前男女犯皆收今則女犯另有監獄專收男犯矣職員除總理副理庶務書記會計外管理員五十人每人薪水每年一千三百可那升至一千八百可那止衣服費則歸國家支給也

調查丹麥審判廳記十二月初十日

丹麥審判制度凡三級各省皆有初級民事刑事審判廳用單獨制不服者控至控訴院控訴院民事裁判官三人附設中央刑事裁判院裁判官五人凡可本海根京城之刑事案件悉歸於此不服者即控至大審院故各省刑事案件由初級而至控訴院再至十審院而京城刑事案件即以中央刑事院爲初審以大審院爲終審止經過二審級此與他國制度不同處也大審院裁判官十二人須九人蒞座方得開審裁判長俸金每年一萬

可那云

調查那威克來司痕佛芝簿監獄及審判廳記十二月十三日

此獄建造已六十年斜十字形樓三層監房二百四十間現收一百九十人女犯另有監獄刑期自六月起至四年止最長之刑期爲十五年則不入此監也工作每日九點鐘夏日十點鐘所作籐籃木器皮靴衣服玩物洗衣所用之木板與他國差同他如冰鞋及冰上游戲之木馬畚雪器則那威所特別者也作工之錢皆歸公犯人每日可得五文至十二文止宗教止耶穌一種讀書或在講堂或在房中不定無體操有休息處總之川絕對分房制者於讀書體操工作均有不便處耳探監分等級或三月一次或八禮拜一次或六禮拜一次或四禮拜一次飲食日三餐朝夕皆牛乳麪包午餐每禮拜二次得食肉或魚送飯用一鐵架下有四輪置鐵攔干上推之各房皆可自取轉相轉送亦一便法也休息處亦分院看室之窓用紅玻璃因如此在內可以見外而外間不能見內也浴室每半月浴一次病院亦清潔熱氣管每翼設二爐以那威天氣甚寒也讀書樓儲書七千卷建築經費九十萬克隆職員三十人一監督一代理一醫士一書記一稽查一庶務一教習

餘二十三人則管理員也午後觀大審院規模亦宏敞但較諸比利時則不逮遠矣那威審判之制初級裁判官一人刑民合於一處第二級裁判官三人刑事民事分庭陪審官十人美國陪審制度十二陪審員中但有一人反對則案即懸擱故多財者每有賄通陪審官之弊那威則取決於多數但得過半數以上之贊成即可定案其法較美國爲善也其初級刑事裁判則用商人二人爲陪審係選出陪審員若干人臨時以掣簽之法行之一則可使法律之用較活一則可使普通之人習於法律知識但陪審員止能評論其是  
否有罪不能干涉裁判之權此項陪審員每年不過輪值一二次故於其職業仍無妨也  
大審院止一庭分刑民爲二須七裁判官蒞席方能審案旋觀高等裁判庭中央三裁判官座右爲被告律師左爲檢察官檢察官之後爲書記右旁橫列者爲原被告左旁橫列者爲陪審官中央爲原被告陳述處其後爲旁聽座另有陪審員會議室律師會議室大審院中七座其餘各座則大致相同也

調查瑞典藍化而姆監獄記十二月十七日

藍化而姆監獄在一海島之中所以防犯人之逃也監房作半月形四翼三層每層百五

十間另有二百間別在一處在監之幼童品行佳者得移入感化院女子另有監獄此監用折衷制初入獄時用分房制在監三年後則用雜居制其工作數人居一處以木柵間之看守人在外巡視可以洞見不令多人羣集一室管理較易周到亦是一法工作皆係手藝如縫衣木工皮工金工之屬不用機器工作者欲令犯人出獄後可以獨立謀生不必專倚竅家也每日工資可得四十文較那威爲優但出獄後每月止准取十五元陸續給付以防浪費制亦頗善有體操輕罪及雜居者皆合操分房者在房中或休息處運動監獄長云將必設法使全體皆合操也教堂止奉耶穌教可容分座者百四十四人兩旁設樓爲雜居之座浴室每半月浴一次探監每月一次飲食日三餐葷菜係鹹魚或鹹肉新近在監中殺一人係用法國之斷頭機蓋自一千九百零三年殺二人以後至今始再見殺人之事云

調查德國警察署記十二月二十一日

德國警察亦隸於民政部各部有一巡撫每省皆另有警廳柏林以地方甚大自爲一行政區警廳之第一司卽行政區故警視總監同時卽爲第一司司長此與各省制度不同

處也第一司司長兼有升降以下各警官之職權以其總司警察行政故也第一司管轄之事極繁故總監局有一中央部專司往來信件之事凡自來水自來火憲兵婚嫁離姻出籍入籍學堂教堂之建築少年失學者入學補習分科之法遺失物件消防隊警部之度支及其統計與栢林警署之房屋皆屬第一司所管警廳共分十部第一司即行政廳第二司掌地方事宜及貿易之事第三司掌營造第四司掌刑事及治安風化第五司掌外國人入籍出籍事宜第六司掌違警罰規如狗不帶皮套及車行太速之類第七司掌政治犯如虛無黨秘密結社之類兼檢查書籍出板事第八司掌檢查戲園凡唱歌電影畫像皆在內兼爲優人出憑照有消防隊爲戲園救火並保護無業貧民第九司掌社會事宜如工人結黨及商會保險事業或僞造商標之類第十司掌交通如火車電車之類除十司之外又分四股一爲恩賞股如有善行奏請旌獎之類二爲交通股三爲小市警察股四爲船戶股四股之警察均著軍衣以與十司之巡警相區別栢林警兵凡分三翼每翼千人或分四區或分五區不等則因地制宜也出觀量犯及印指處犯人入監先量其頭直徑長若干橫徑寬若干兩額寬若干中指小指長若干立時身長若干坐時長若干



千印指之法則用一定格式之帶以指蘸墨將十指依格印於帶上分爲四種以類相從其藏儲指印模之筒分三行每行九格共二十七格而每格中又分三小格每一小格中爲十類共計九九八十一格凡爲類八百有一十分分析至細故依類檢之即可得也相片每人照二張一正一側有喬裝者則兼攝喬裝之影其面有特別記認者亦另填一帛存放一處以備稽查走廊外懸相片甚多死者係無名屍首招人認取生者係在逃未獲之犯又懸手套一只詢之係殺人兇犯所遺故懸之以購求其人也次觀沒收禁物處凡手槍尖刀偽貨幣鈔票郵票竊賊所用燈鎗鐵鑽軟梯之屬又有墮胎器具及用炭酸燒毀銀箱之機器有謀殺人刳爲數塊藏諸箱內者破案後將遺骸攝影之照片春冊等類另儲一玻璃筒而以布套罩之德國警察於此等敗壞風俗之物稽核尙嚴較諸巴黎之公然出售者爲嚴肅矣

調查德國司弗拉司勃兒童子感化院記十二月二十四日

此等感化院並無監獄性質乃參用小學及家族制度而成幼童羣居一室談笑皆可任意大致專重教養其男女教員皆由政府攷試得有文憑者院中職員退職後皆有養老

經費院中常年經費亦由國家支出男女各爲一院每院中分爲三區分紅白藍三色依家庭教育法故每一色自爲一家男有保父女有保母以教導之年稍長而失學者入實業學校補習以爲將來謀生之地兼教理化動植物學與地學之淺近者工作如訂書縫衣織襪製皮鞋打線袋製棕帚糊信封等或歸公用或出售均可習種植者有場圃習畜牧者有牧場體操每日一小時浴室每星期一次飲食日三餐肉用機器切細而分故甚均而無多寡肥瘦之差臥室每人一床雜居一室有管理人臥於旁以照拂之晨起必自將被褥舖好惟病院因有傳染病僅略觀下層而已復至各室參觀一室中見幼童二十二人方習字一室見女孩十六人打手套一室見幼孩方讀書年十歲許背誦鎮守來因何故事朗朗可聽又一室唱歌者二十餘人全院男女約四百餘人凡幼童入感化院之原因有三一曰父母醉酒或犯姦虐待幼孩者由後見人送入二曰幼孩自犯行竊等事父母不能管教者亦可送入三曰年至十四五歲幼時失教不能成立父母不能教養者亦可送入要之此院之宗旨凡父母不能教養其子者國家即爲幼孩之父母可以代之養育教導家中有錢而其子不率教者亦得將教育費送入院中或有多財而置其子於

不願者國家亦得強令每年繳費若干院中由父母給費者不過十分之一每年所入不滿九百馬克者即可不必繳費因貧民幼孩不能成立國家皆當成全之也院中幼童最小者五六歲最大者十七八歲至二十一歲以上或出院自謀生計或歸入陸軍云

調查德國脫格爾監獄記十二月二十六日

脫格爾監獄建造已二十年凡四層每層監房一百四十三間中分三區中央爲十字形左右爲丁字形監房共一千七百餘間現收犯人一千六百有奇爲德意志最大之監獄德國監獄制度旣以五百五十人爲限此雖收犯人甚多而實分爲三類以刑期一月至三月者爲一區三月至一年者爲一區一年以上者爲一區而每區各有一監視長故仍與其宗旨不相悖也輕罪者作工時雜居夜則分房重罪仍用分房制蓋兼用寬嚴二派也宗教係新耶穌教教堂能容四百人每星期三次蓋三班輪流聽講也工作如糊郵政信封作德律風機器皆爲國家所用餘如木工皮工冶鐵縫衣織襪之類則商家包工也工資多者每日可得三十文代爲存儲出獄時始給付讀書擇其不識字者令補習之體操各在房中懸柔軟操圖於壁按圖而習之病院每區一處約容三四十人有割症室小

割症在監醫治大割須送至柏林醫院飲食日三餐每星期食肉三次探監不分罪之輕重皆每月一次建造經費三兆馬克常年經費官吏薪水三十五萬馬克犯人每人每日約費三十五文其餘經費約數千馬克全監職員總辦一人各區監視長共三人牧師二人教師一人醫師二人監督九人副監督九人幫辦十二人稽查一百十三人監外鐵柵中畜二犬以備警夜有犯人照相室凡在警察局未經照相者補照二分一送警局一存監中犯人量身亦在此瘋人監禁室中空無一物燈光亦由隔壁室中透過欲使無物可擊毀也犯人不守規則罰入屏禁室者飲食僅給與麵包白水亦懲戒之法也

調查奧國審判廳及輕罪監記 正月初三日

奧國審判制度大審院一間官五人至七人高等裁判所九間官五人地方裁判所七十小案裁判官四人無陪審大案裁判官三人而加十二陪審員皆刑事民事混合另有刑事一庭民事一庭商業裁判一庭此三處之案件關於事實點得控至高等裁判所關於法律點則上告至大審院也初級裁判所不計其數所管轄之案件以一千哥倫以下及監禁六個月以下爲限也大審院檢察官一人高等裁判所檢察官九人地方審判廳檢

察官七十人各有候補者一人爲之副此其制度之大略也先觀高等刑事裁判庭中五座爲裁判官左爲檢察官右爲書記官再次爲律師其下與裁判官座相對者爲旁聽座次觀地方裁判庭通計各庭裁判官共六十五人而以十一人爲總理每庭中三座爲裁判官旁一座爲預備裁判官若三人中有一人病者即可補充裁判官之右一座爲檢察官左二座爲預備陪審員以下橫列者右二座爲原被告律師左六座爲陪審員中央爲原被告陳述處無座位其右二座與預備陪審員相對者爲醫官最後橫列向裁判官座者爲旁聽座陪審員制以三分之二決議爲定案陪審員會議室當會議時入門後外面即鎖門以防漏洩另有一室可通至大街恐萬一有火災不及開門即可由此而出也陪審員掣簽處中三座爲裁判官右二座司掣簽左一座掌書記案上設二銅鑪投名於內而掣取之共掣三十六人蓋取三倍之數開審時三十六人皆須到庭因當堂掣取十二人如有除斥避忌等情則須以餘人更換也旁附設輕罪監獄長名幼孜刑期自一日起至二月監禁止其有定罪一年在監作工佳者亦得移入此監因此監待遇較寬也然亦係少數其一年以上罪者必須送至他監矣監中可容一千人現收九百九十人舊者

皆雜居制大房住十八人小者住三四人新造之監皆用分房制房中有床及棹椅電氣燈自來水之廁所凡四層五十四間每一層有一監察官全監管理員一百十八每日休息一小時洗澡每月一次病院中之犯人每日得食肉餘犯每星期食肉三次有錢者得自買食以係輕罪監故也工作有印書木工縫衣製皮靴冶鐵等項女犯有在廚房執役者每日工資可得十文云

調查奧國司丹痕監獄記 正月初五日

此監起於一千八百四十三年係由童貞姑舊廟基改爲之專爲維也納罪人而設以後逐漸擴充計可分爲三時代第一次爲舊監第二次於左旁添建監房係一千八百五十年所建仍用雜居制迨二十年後第三次添造者始用分房制時則一千八百七十三年也現在又添造新屋可爲第四時代其第一次之舊監已置不用改爲辦事室矣我國人言及改良監獄者動謂我輩尙無好屋居住何必使犯人居此大廈詎知歐州乃以舊監改爲辦事室而特建新監以處犯人何見解之兩相刺謬乎其亦可三復思之矣新造分房者計三百十八間餘爲雜居制蓋用折衷制也全監共收罪犯八百五十人刑期自六

月起至終身監禁止其中自六月至三年者爲最多蓋居三分之一也監中罪犯分爲甲乙丙三班甲班用白巾乙班用黃巾丙班用黑巾以示區別探監丙班三月一次乙班六星期一次甲班每月一次如有病及銀錢要務得監獄長之許可者亦得通融工資分爲九等自每日十二文起多至每日三十六文止如有功過監獄長得以職權升降其班次工作惟製襪縫衣糊信封三種爲包工餘均爲國家公用如釘書皮靴木器鐵器棕帚之屬將來當漸逐改爲全歸公用云飲食日三餐每星期食肉三次每日散步一小時無體操不識字者每日讀書二鐘一日分二班每星期六次蓋輪班講習也監內藏書約七十卷之譜教堂係天主教猶太教另有一小堂病院共四間每間容二十人病人以癆病居多數病重者君主得以職權減輕其非常年經費除工資所入外每年須津貼三十萬至五十萬哥倫管理員一百零二人內有七人係職官監獄長一人其品級得由第十一級升至第七級也通奧國監獄男監十有五女監六監獄經費由國家支出男監管理監獄人員皆曾經當兵十五年退伍之人由監獄長二人會同法部長官考試錄用女監則由童貞姑爲管理奧國死刑亦用絞然死刑近已十年發生矣

調查匈牙利女子感化院記正月初九日

匈牙利女子感化院建造已二十年逐漸擴充最新者落成僅六七年也現收三百十一人分爲八區每區爲一家所收皆犯輕罪之人亦有由父母送入者惟須出一憑據不致成者不得半途出院所教係針黹文字及管理家務之法各區以罪之輕重爲區別最輕者在院不過七八個月每區一種工業如刺繡紮花製鏤空花邊縫衣各事觀至第四區女教習令繡女停針自按風琴使唱歌一闌旋出各種成績品見示繡花之最佳者亦能與中國相仿也第三區有一幼女僅七歲半習縫紉之事乃父母所送入者也各區無論何時不得彼此交通作工時亦不許任意談笑故人數雖多而靜極謐各區班次不同作工勤而品行佳者得以升班升班者待遇亦較優也居院中最久者得自七歲起至二十一歲止也院外有畜牧場教以養鷄牧牛等事工作係包工所得工資代爲存儲出院時給與本人惟利息則須歸公也每日作工上半日八鐘起至十一鐘半止午後一鐘起至六鐘止六鐘至八鐘讀書晨起六句半鐘夜睡則九鐘也管理員皆女子須得政府致試畢業文憑惟教士及院長二人爲男子教堂三處一天主一耶穌一猶太以天主教爲最



多飲食每日五次以幼童身體氣血未長足尤以飲食爲最要故也此院中之特長在於教以尋常日用之事使出院後足以自立而絕無踵事增華之習蓋儉字亦爲教育中一件要務云

調查匈牙利幼年裁判所待質所大審院童子感化院記正月初十日

匈牙利幼年裁判所中爲裁判官座右爲書記官兩旁橫列者右爲檢察官左二座一爲保釋官一爲被告律師幼童自十二歲至十八歲均在此裁判其律師由幼年犯罪保護會公請故幼年犯不須出費觀審二案一係幼童竊電氣公司手槍判監視一年由保釋官保出一係幼子不率教喜與匪人爲伍由父親呈請收院教誨判收禁一年定案後其父與之握手接吻爲別幼童泣涕漣洳觀之令人心惻幼年犯罪不盡監禁大約情有可原者皆准保釋惟犯竊盜及流爲乞丐者必須監禁也出觀待質所未定罪者三百七十人己定罪者四十五人即留所中執役因均係輕罪最長者止一年半監禁耳樓四層每層雜居制十間分房制十四間共計雜居制四十間分房制六十五間其應雜居或分房者種類甚多大致如行竊者幼年者新入監者皆必須分房惟輕罪在監日久者可以

雜居而所犯罪名等級不同者亦不使雜居一處也待質之犯不必一定作工其願作工者亦可稍得工資云庭往觀大審院堂高數仞門廠九重窗嵌彩玻柱雕華石壁塗丹臚地飾巋譎其規模之宏麗與昨所觀議政院相埒蓋公共營造物自應崇其體制也午後復偕柴瀆阿至廊羅斯觀童子感化院建造已二十五年舊屋現方折造新建者甫六七年幼年犯三百八十人分爲十六家所收以幼年犯罪者爲多劣子不率教亦可由父母送入但須得法部大臣之許可年齡自七歲起至二十歲止工作如籐籃鐵床鐵器木器織機製皮之類而以造馬車汽車爲最大之工作每年可出車六十部每日工作時刻自早五鐘半至晚六鐘止午前或有時讀書午後則全係工作矣夜九鐘就寢工作多用機器然入院之初必先習手工四年再用機器作工如是則出院後不必定倚工廠爲生活也年滿出院給與文憑歸公家工廠收用在院所得工資存入儲蓄銀行俟出院時始給與之院中管理員二十五人教工作者五十人又有時藝圃畜牧場亦令幼童習之大有牛宮草暖農舍花晴之意溫泉一曲環遶花房尤宜於冬月之種植亦天然勝境新建之樓尤軒敞尙未工竣也院中制度分爲四等一爲晝夜分房二爲晝雜居而夜分房三爲

晝夜雜居四爲保釋各因其犯罪之輕重及年齡之長幼由裁判官臨時酌定者也

調查匈牙利童子監獄及刑具陳列所記 正月十二日

此監本係重罪監今改爲童子監獄建造十有五年大約共收犯人八百四十之譜內以幼年女犯爲一區幼年男犯爲一區未定罪者爲一區男犯二百十九名女犯三十五名男犯中亦有成年者幼童止百餘人將來則擬一律改作收禁幼年犯也此監與廓羅斯幼年感化院相似大約年稍長者入此監年幼者入感化院其應歸入何處裁判官有判定之職權也工作分製皮冶鐵縫紉木工訂書印刷各項幼年工作皆歸公用年長者用包工之法犯人工資可得出售後贏利中三分之一代存於儲蓄銀行出監時給付病院中病者約二十人以癆瘵爲多有分房有雜居其分房或因其病欲傳染或其罪本須分房也又有瘋人院則皆成年罪犯由各監送入者惟定罪後而病瘋者入此院其未定罪而病瘋者由官醫驗明可以無罪送入普通瘋人院中刑期滿後而瘋病未愈者亦送至普通瘋人院此院可容八十人多至百二十人現收八十五人監禁瘋人房中其簾床皆圓轉角以防抵觸瘋病欲動武者室中空無一物止有被褥使之無物可擊燈在門楣之

上手所不能攀及也瘋人亦有工作止能糊信封而已大約得瘋病者以三十至五十歲爲最多云復導觀刑具陳列所分爲三部分一爲舊監獄情形二爲改良監獄之情形三爲現在罪犯所作玩具觀之可見監獄進化之階級第一區所陳設各種刑具如鐵鍊鐵鎖之屬甚夥有受杖模形係一木凳兩手用兩鐵箍背有一鐵圈令犯人覆臥於凳而以木板笞之木板橢圓形厚寸許中鑿小孔數十不知何故柄長三尺許並有受杖照片懸掛壁間又或縛人兩手於車輪而鞭之縛處有鐵二塊如刀鋒而鈍欲其手足相着而痛也或以軟梯盛人令兩人昇之一人馳馬而過其上或縛人於車輪令數馬曳之而馳或爲一大輪中分數十格置犯人於其中而轉之犯人終日隨輪而走不得休息種種奇形怪狀之刑法爲中國人意思所不及卒以行之無效而翻然變計今之反對減輕刑法者可以憬然晤矣第二區爲各種監獄之小模形可以見其進化之序第三區皆犯人所作玩具內一犯人以麪包製成飛仙像極精巧之致此飛仙石像在監獄外橫街中間犯入監時過此僅一見之而能以麪包默造其形且無絲毫或爽工巧如此而不免於犯罪豈非聰明誤用耶德國監獄於犯入用麪包作玩具者則搜索而嚴禁之此作爲陳列之

品其寬嚴又迥乎不同矣

調查土耳其審判制度記 正月十六日

土國裁判之制分爲三級初級裁判官三人分爲刑事民事商事而刑事又以重罪輕罪最輕罪分爲三級以上爲控訴院裁判官五人刑事民事商事亦分庭大審院爲最高裁判分三庭一刑事一民事一係審查案件應否上告者每庭總理一人副理一人裁判官六人至八人審案時有律師而無陪審員犯人坐而聽審監獄中無工作死刑亦用絞現方修訂律文但取不用者抽出更正之並非全易也法律上關於司法之事分爲二種一掌司法一掌司法行政司法行政之長官即法部大臣有調度司法官吏之權而不能干預裁判監犯全歸民政部管理但法部官吏每月必至監獄中攷察一次報告於法部大臣另由法部大臣派四人至各處巡查裁判官斷案之善否有幫辦官六人此等官吏兼有攷查監獄之權報告於法部大臣土國亦有領事裁判權亟亟謀所以去之以爲徒改法律而無善良之裁判官領事裁判權終不得撤去故特設此制也土自革命以來凡新法皆極力仿行現在新君主但主畫諾而已

調查土耳其議院及監獄記正月十八日

土耳其下議院分爲三部分左爲政府黨右爲民黨中央爲調停黨所提出之議案係頒布法律政府黨主張全用土耳其文字民黨則謂土耳其國中文字不一或用希臘文或用亞拉伯文或用羅馬尼亞文法律既欲使民間週知自應譯成各種文字然後頒佈政府黨則謂土耳其之法律止能用本國文字且如英國屬地雖多其法律仍一以英文爲主也彼此皆持之有故兩爭不決其如何議決則不及知其究竟矣次觀上議院及各部會議室藏書處接待室等處而出午後由薩丁培導觀輕罪監獄全用雜居制共六百餘人並無工作惟一處有作木工者蓋犯人本能爲此則令爲之所作工資皆歸自得其不能作工者則終日坐食而已薩君因言我國監獄之不良如此不能怪歐洲之有領事裁判權惟有亟謀改良監獄裁判然後可徐圖撤去耳然土之有領事裁判權尙係混合裁判故無論土人控告西人或西人控告土人皆須會同審判西人亦得監禁於土國監獄之內較諸中國之設完全領事裁判權者尙差勝一籌猶且日夜謀所以撤去之我國士大夫有監獄裁判之責者正宜同心協力以擔此莫大之責任矣

調查希臘監獄記 正月二十三日

希臘童子監獄建造已十年凡三層分房制計二百間現收二百人已滿額矣此監乃希臘富翁阿范而夫獨力捐助故刻阿君石像於院中以爲紀念阿君並助國家戰艦一艘又建大石戲台一洵急公好義之士也工作如訂書製皮靴製棕刷木工鐵工之屬或由廠家包做或歸公用二法兼有工作時雜居一處夜臥分房讀書每日二鐘體操冬日二鐘夏日一鐘宗教係希臘教須立而聽講故教堂無坐位飲食日三餐有飯堂病院下層雜居樓上分房以備有傳染者居住也探監或一月一次或須一月以上則以罪之輕重爲區別每次探監不得過半句鐘之久管理員二十人常年經費由國家支出犯人出獄後須自行謀生地方亦有免囚保護會代爲維持而現在皇后亦頗留心監獄之事云惟監獄樓上地平已有坍塌處而未修葺因修理之事歸民政部而不由法部管轄故也午後觀女監獄監房一百二十間收女犯一百十二人管理員十六人均係女子惟管門者爲男子年已老然亦不住監內作工時雜居有縫衣打花邊打線袋織布織巾織毯等項廚房甚清潔蓋女犯皆情願食稍少而品味較美也希臘男女之別較歐洲他國爲嚴故

女子犯罪之數亦較少與男子相比大約不及百分中之一五也午後觀重罪監計收罪犯二百八十四人刑期均係三年以上者但全用雜居制夜臥每監九人未爲盡善工場可任意通語亦頗嘈雜工作如縫衣製靴冶鐵製洋鐵器之屬而以木工爲大宗又或以帚作杖堅勁如木質他如畫花於玻璃及修理鐘表製造樂器平金繡件之類則因其本習之技而令爲之非普通之課程也工作材料皆政府所出所得工資半歸政府半歸犯人故極多者出獄時可積至一千佛郎蓋欲其多積錢則出獄後可自謀生計不至再犯也歐洲各國犯人工資以希臘爲最優矣每日休息一小時無體操病院中病者七人此監亦係富翁辛格拉斯所捐助繪像於廳事之頂篷何希臘好義者之多也然兩日前車行希臘市有人自壁間鐵柵內出長瓢乞錢者詢諸導引人云係監獄豈公家獄制未盡改良歟抑所禁者皆死囚故待之甚酷歟西人於監獄制度之不善深自掩諱故不便究問莫得其詳也希臘殺人無劊子手遇行刑時則出死囚問之願抵罪抑願爲殺人者如願殺人即赦其死罪使爲劊子手殺畢仍置諸監內以後有死罪犯即令其人行刑劊子手無人肯爲當由希臘之宗教而然然亦可見死刑之反乎人道將來終必有廢止之一



日矣希臘審判制度分三級大審院分二庭每庭裁判官六人大案亦可十二人蒞庭高等裁判所裁判官五人初級裁判所裁判官三人從前有商事裁判現已廢去蓋由國小而貧商務清淡故也陪審官十二人取多數決如得平均數即爲無罪與那威制度同希臘裁判制度用法國法系而刑商法則仿德國係用日耳曼法系也

調查意大利審判廳記 正月三十日

意大利大審院初級民事凡四庭刑事六庭每庭裁判官一人陪審員十二人左檢察官座右書記座陪審取多數決得平均數者即爲無罪與那威希臘之制同民事控訴院裁判長一人裁判官四人學習裁判官四人檢察官一人書記官一人凡二庭刑事控訴院同凡四庭大審院裁判長一人裁判官六人凡案經控訴院判決後不服而再經上訴者須裁判官十四人會同共審也每庭皆書法律爲公衆而設一語此羅馬之古格言也法庭屋面刻一石狼云羅馬之初祖爲狼所產此與元秘史所述元之始祖爲蒼色之狼與慘白色之鹿產人於幹難河之源者相類殆亦元鳥生商之意耳大審院係新落成規模極宏大石柱大數抱雕鏤極精蓋刻石本羅馬人長技也費金錢十四兆而論者猶以爲

外觀甚美內中法庭未免狹小不適實用意大利國甚貧而於公家建築精愈求精若此我國視之大有愧色矣

調查意大利待質所及貧民教養院記二月初一日

意大利待質所爲一千八百八十九年所造用雜居制凡三十間數十人雜居一大間如客棧然工作皆玩物作否聽便以待質者拘留不久且不得遽指爲犯人故也雜居人數太多飲食日二餐廚房亦不甚清潔不無缺點病院皆分房凡二層下一層五十八間輕病居右重病居左上一層左爲病房右爲剖解室蓋分內外症爲兩層也廚房較爲清潔病人經醫生驗視無妨礙者得許飲酒病院中有一盥盤管橫置則水止直豎則水流泄水處有一火爐豎直水管則火即然而流注之水已熱亦巧製也浴室十間浴池皆砌石於地每間有一矮門與上海之澡堂相似也觀藏書樓有書五千卷各國法律另儲一架餘均本國法律觀總理辦事室樓下有一回亭分二十格每日定一點鐘犯人有要事者可至此呈請總理面訴也此監對門即已決監兩相嬖連監內另有樓四層分四翼共計八百五十二間皆分房制以供對面已決監犯人止宿之用已決監工場以一大間分作

五間每間約四五人其法甚善蓋工場雜居人數太多每有招呼不週之弊四五人爲一室則嘈雜之弊可免矣作工者二百四十五人每人每日所得工資自一佛二十生丁至二佛半不等每日作工約十點鐘如過十點鐘則每鐘作兩鐘計算可得五十生丁也工作分製鉛字印書縫衣木工冶鐵製皮靴等項全監管理員一百五十人蓋統未決監計之也意大利無死刑其終身監禁者至二十年或三十年後亦往往得邀特赦之恩也幼年罪犯每日讀書二鐘禮拜四及禮拜日無課讀書堂可容六十人也午後往觀幼年貧民教養院分爲數區有縫衣者有製皮靴者有雕木器者有製鐵器者四年或五年畢業自十歲起至二十歲止刻木者先以泥模型令雕花習成後然後雕刻木器習機器者先令碾鐵作各種形式令極平極準然後製器者有陳列室臚列各種成績以年齡長幼分別排列以備賽會之用幼孩初入院者亦令至陳列所觀覽願習某項可聽自擇樓上陳列各種鑛質及礮器有電報無線電小模型乃理化試驗室也此院建造已二百年凡三層每層三十間飲食每日三次每禮拜有一日得飲酒食肉然幼童飲酒似非所宜蓋意大利習俗好飲熱皮酒也觀畢院長取刻木人面見贈以爲紀念出院時有幼童二十人

作樂亦院長所命以示歡迎之意也

調查意大利鐵伐里幼年感化院記二月初二日

鐵伐里幼年感化院院長曰狄儀全院共收三百二十人自十歲起至二十歲止分爲三區每一人管理二十人第一區係十五歲以上者臥室每一大間用白鐵隔成十間共十六間可容一百六十人工作分雕花製皮靴縫衣木工冶鐵各項四年畢業讀書室每間容十二人有音樂室演戲臺乃幼童心理之所喜也有農事場爲習種植之用教堂甚小無坐位皆立而聽大半皆立於門外止天主教不得從他教也陳列室有鐵花二架綠漆繪畫藤穿棹椅全副皆備賽會之用第二區則十五歲以下之幼童工作與第一區同而程度較淺臥室同前可容九十三人讀書堂書棹有屐可放書而後面皆用鐵絲而不用板防幼孩藏玩物於其中其法頗好用之蒙小學攷試尤宜屏禁室中有一幼童在內因教習令將頭擡起答云吾頭擡不起以不率教故罰之也第三區爲犯罪幼童感化院性質不良者令居樓上用分房制每間皆用牆壁不似第一第二區之僅用白鐵隔絕矣飲食日三餐每禮拜得飲酒食肉二次云

